



Datganiad o Bolisi Trwyddedu Cyngor Sir Penfro

Ionawr 2016

Deddf Gamblo 2005

Mae rhagor o wybodaeth i'w chael o'r:

Tîm Trwyddedu

Isadran Diogelu'r Cyhoedd

Neuadd y Sir

Hwlfordd

Sir Benfro

SA61 1TP

Ffôn: 01437 764551

E-bost: licensing@pembrokeshire.gov.uk

Gwefan: www.pembrokeshire.gov.uk

**Mae'r polisi hwn i'w gael hefyd yn y Saesneg neu brint bras trwy wneud
cais i'r Tîm Trwyddedu.**

Contents

1. Datganiad o Bolisi Trwyddedu.....	3
1.1 Cyflwyniad	3
1.2 Proffil o Sir Benfro	4
1.3 Amcanion	5
1.4 Swyddogaethau'r Awdurdod Trwyddedu	6
1.5 Ymgynghori	7
1.6 Awdurdodau Cyfrifol	7
1.7 Rhai â Diddordeb.....	8
1.8 Cyfnewid Gwybodaeth.....	9
1.9 Gorfodi.....	9
1.10 Hawliau Sylfaenol.....	10
1.11 Cyfannu Strategaethau ac Osgoi Ailadrodd	10
1.12 Strategaeth Gymunedol Datblygu Cynaliadwy	10
2. Trwyddedau Eiddo.....	11
2.1 Egwyddorion Cyffredinol.....	11
2.2 Amgylchedd Briodol i Drwydded	13
2.3 Eiddo "yn barod ar gyfer gamblo"	13
2.4 Ystyriaethau Eraill.....	14
2.5 Ailadrodd cyfundrefnau rheoleiddiol eraill	14
2.6 Amcanion Trwyddedu	15
2.7 Gwyllo Betio.....	16
2.8 Amodau	17
2.9 Porthorion	18
2.10 Canolfannau Gamblo Oedolion	18
2.11 Canolfannau Adloniant i'r Teulu (Trwyddedig).....	19
2.12 Casinos	19
2.13 Eiddo Bingo	20
2.14 Eiddo Betio	20
2.15 Traciau	20
2.16 Peiriannau Gamblo	21
2.17 Peiriannau Betio	21
2.18 Ceisiadau a chynlluniau.....	21
2.19 Ffeiriau Teithiol	22
2.20 Datganiadau Darpariaethol.....	22
3. Hawlenni / Rhybuddion Defnydd Achlysurol a Thros Dro	23

3.1	Hawlenni Peiriannau Gamblo mewn Canolfannau Didrwydded Adloniant i'r Teulu.....	23
3.2	Hawlenni Peiriannau Gamblo Eiddo Trwyddedig (Alcohol)	24
3.3	Hawlenni Gamblo am Wobr.....	25
3.4	Hawlenni Gamblo Clwb a Pheiriannau Clwb	26
3.5	Rhybuddion Defnydd Dros Dro	27
3.6	Rhybuddion Defnydd Achlysurol.....	28
4.	Loterïau Cymdeithasau Bach	28
5.	Penderfynu	28
5.1	Gweinyddu, Arfer a Dirprwyo Swyddogaethau	28
5.2	Y Drefn Apelio	29
5.3	Rhoi Rhesymau dros Benderfyniadau	29
5.4	Gweithredu Penderfyniad y Llys Ynadon.....	30
5.5	Cwynion yn erbyn Eiddo Trwyddedig	30
5.6	Adolygiadau.....	30
6.	Amodau Trwyddedu a Chodau Ymarfer 2015 (LCCP)	31
	Asesiadau Risg – Eiddo Betio	32
7.	Rhagor o Wybodaeth	33
	Atodiad A Mynediad at Eiddo	35
	Atodiad B Rhestr Ddirprwyo Swyddogaethau a Phenderfyniadau Trwyddedu.....	36
	Atodiad C Diffiniadau	38
	Atodiad D Crynodeb o Ddarpariaeth Peiriannau yn ôl Eiddo.....	39

1. Datganiad o Bolisi Trwyddedu

1.1 Cyflwyniad

Mae Deddf Gamblo 2005 (y Ddeddf) yn gofyn bod y Cyngor yn paratoi a chyhoeddi “Datganiad o Bolisi Trwyddedu” sy’n cyflwyno’r egwyddorion y mae’r Cyngor yn bwriadu eu defnyddio wrth arfer ei swyddogaethau trwyddedu wrth ddelio â cheisiadau am Drwyddedau Eiddo, yn ôl gofynion y Ddeddf.

Mae’r Datganiad Polisi hwn yn dod i rym ar 31^{ain} Ionawr 2016. Bydd yr Awdurdod Trwyddedu hwn yn diweddarau a chyhoeddi Polisi Trwyddedu newydd pryd bynnag y bydd angen ond, sut bynnag, cyn pen 3 blynedd ar ôl dyddiad y Polisi hwn, a bydd yn ymgynghori’n llawn â phartneriaid, cymdeithasau masnachol a grwpiau trigolion fel y bo’n briodol ac yn ystyried unrhyw sylwadau a ddaw i law bryd hynny.

Fodd bynnag, pan fo angen diweddariadau oherwydd newidiadau mewn deddfwriaeth genedlaethol, canllawiau statudol neu fanylion cysylltu, mae’r Cyngor yn cadw’r hawl i newid y Polisi hwn heb ymgynghori os oes angen sicrhau bod y polisi’n adlewyrchu deddfwriaeth genedlaethol neu ganllawiau statudol.

Wrth gynhyrchu’r Datganiad Polisi terfynol mae’r Cyngor yn datgan ei fod wedi ystyried amcanion trwyddedu’r Ddeddf, y Canllawiau i awdurdodau trwyddedu a gyhoeddwyd gan y Comisiwn Gamblo (y Canllawiau), unrhyw godau ymarfer ac unrhyw atebion oddi wrth y rhai yr ymgynghorwyd â hwy ar y Datganiad Polisi.

Mae gan y Cyngor ymrwymiad cyfreithiol i gydymffurfio â holl ddeddfwriaeth sy’n hyrwyddo cydraddoldeb ac mae ganddo bolisi ar hyrwyddo cydraddoldeb i bawb. Bydd trwyddedu pobl ac eiddo dan y Ddeddf yn mynd ati i hyrwyddo cydraddoldeb gwasanaeth a gorfodaeth i bob aelod o’r gymuned.

Mae Deddf lawnderau Dynol 1998 yn ymgorffori’r Cytundeb Ewropeaidd ar lawnderau Dynol ac mae’n ei gwneud yn anghyfreithlon i awdurdod lleol weithredu mewn ffordd sy’n anghydnaws â hawl o’r fath. Bydd y Cyngor yn ystyried Deddf lawnderau Dynol wrth ystyried unrhyw faterion trwyddedu ac, yn enwedig, o ran sut gaiff ceisiadau eu hystyried a gweithgareddau gorfodi eu gwneud.

Mae’r Cyngor yn cydnabod y gall fod angen iddo wro o’r Polisi hwn ac o ganllawiau a gyhoeddwyd dan y Ddeddf dan amgylchiadau unigol ac eithriadol a lle bo’r achos yn haeddu penderfyniad o’r fath er mwyn hyrwyddo’r amcanion trwyddedu. Bydd unrhyw benderfyniad o’r fath yn cael ei wneud ar ôl ymgynghori â chynghorwyr cyfreithiol priodol yr Awdurdod Trwyddedu, a bydd y rhesymau dros unrhyw wyriad o’r fath yn cael eu cofnodi’n llawn.


1.2 Proffil o Sir Benfro

Poblogaeth Sir Benfro oedd tua 123,300 yn 2013 ac mae o gymeriad gwledig yn bennaf. O amgylch chwe phrif drefi Abergwaun, Hwlfordd, Aberdaugleddau, Dinbych-y-pysgod, Penfro a Doc Penfro mae pentrefi niferus, pob yn gyda'i gymeriad unigol ei hun.

Yn y Sir mae rhyw 1400 eiddo dynodedig yn dal amrywiaeth o drwyddedau a hawlenni dan y Ddeddf. Trwyddedwyd amryw eiddo ar gyfer bingo; canolfannau adloniant i'r teulu; canolfannau gamblo oedolion ac eiddo betio. Caiff rhybuddion defnydd achlysurol eu derbyn bob blwyddyn hefyd ar gyfer amryw ddigwyddiadau, fel traciau rasio o fan i fan sy'n cael eu cynnal yn y Sir. Mae'r rhain yn gwneud cyfraniad hanfodol at yr economi lleol, trwy dwristiaeth a datblygiad diwylliannol. Cyflogaeth yn Sir Benfro oedd 44,200 yn 2013, cynnydd o 2.8% ers 2009. Mae hwn yn gynnydd cyflymach nag yng Nghymru gyfan (0.6%) a Phrydain (1.6%). Mae crynadau sylweddol o gyflogaeth yn Sir Benfro mewn: llety a gweini bwyd; celfyddyd, adloniant a hamdden; adeiladu; a diwydiannau cloddol.

Mae'r diwydiant ymwelwyr yn effeithio'n sylweddol ar y boblogaeth ar rai adegau o'r flwyddyn. Caiff 6,900 o bobl (3,800 yn fwy na'r cyfartaledd) eu cyflogi mewn twristiaeth, gyda niferoedd sylweddol yn gweithio ym meysydd llety a safleoedd gwersylla; atyniadau ymwelwyr; tai bwyta a chaffis; clybiau; a thafarnau a bariau.

Ffigur 1: Tiriogaeth Cyngor Sir Penfro



1.3 Amcanion

Wrth arfer y rhan fwyaf o'i swyddogaethau dan y Ddeddf, rhaid i'r Cyngor, fel yr Awdurdod Trwyddedu, ystyried yr amcanion trwyddedu canlynol:

- **Atal gamblo rhag bod yn ffynhonnell trosedd neu anhrefn, bod yn gysylltiedig â throsedd neu anhrefn neu gael ei ddefnyddio i gynorthwyo trosedd;**
- **Sicrhau bod gamblo'n cael ei gynnal mewn ffordd deg ac agored;**
- **Amddiffyn plant a phobl ddiamddiffyn eraill rhag bod gamblo'n peri niwed iddynt neu'n camfanteisio arnynt.**

Dylid nodi bod y Comisiwn Gamblo wedi datgan: "Mae'r gofyniad mewn cysylltiad â phlant yn bendant er mwyn eu gwarchod rhag bod gamblo'n peri niwed iddynt neu'n camfanteisio arnynt".

Mae'r Cyngor yn ymwybodol wrth wneud penderfyniadau ar drwyddedau eiddo a rhybuddion defnydd dros dro y dylai, yn ôl Adran 153, amcanu at ganiatáu defnyddio eiddo ar gyfer gamblo i'r graddau y mae'n credu ei fod:

- yn unol ag unrhyw god ymarfer perthnasol a gyhoeddwyd gan y Comisiwn Gamblo;
- yn unol ag unrhyw gyfarwyddyd perthnasol cyhoeddwyd gan y Comisiwn Gamblo;
- yn cyd-fynd o fewn rheswm â'r amcanion trwyddedu;
- yn unol â Datganiad o Bolisi Trwyddedu'r Cyngor.

1.4 Swyddogaethau'r Awdurdod Trwyddedu

Dan y Ddeddf mae gofyn i'r Cyngor wneud y canlynol:

- Bod yn gyfrifol am drwyddedu eiddo lle mae gweithgareddau gamblo i ddigwydd trwy roi trwyddedau eiddo;
- Cyhoeddi datganiadau darpariaethol;
- Rheoleiddio clybiau aelodau a sefydliadau lles glowyr sydd am gynnal gweithgareddau gamblo penodol trwy gyhoeddi hawlenni gamblo clwb a/neu hawlenni peiriannau clwb;
- Rhoi hawlenni peiriannau clwb i glybiau masnachol;
- Rhoi hawlenni ar gyfer defnyddio rhai peiriannau gamblo betio llai mewn canolfannau didrwydded adloniant i'r teulu;
- Cael hysbysiad o eiddo trwyddedig ar gyfer alcohol (dan Ddeddf Trwyddedu 2003) o ddefnyddio dau beiriant gamblo neu lai;
- Cyhoeddi hawlenni peiriannau gamblo eiddo trwyddedig ar gyfer eiddo gyda thrwydded i werthu / cyflenwi alcohol i'w yfed yn yr eiddo trwyddedig, dan Ddeddf Trwyddedu 2003, lle mae mwy na dau beiriant;
- Cofrestru loteriau cymdeithasau bach islaw trothwyon penodedig;
- Cyhoeddi hawlenni gamblo am wobr;
- Derbyn a chymeradwyo rhybuddion defnydd dros dro;
- Derbyn rhybuddion defnydd achlysurol;
- Rhoi gwybodaeth i'r Comisiwn Gamblo ynghylch manylion y trwyddedau a gyhoeddwyd (gwelwch yr adran isod ar gyfnewid gwybodaeth);
- Cadw cofrestri o'r hawlenni a thrwyddedau sy'n cael eu cyhoeddi dan y swyddogaethau hyn.

Dylid nodi nad yw awdurdodau trwyddedu'n ymwneud o gwbl â thrwyddedu gamblo o bell, sy'n cael ei reoli gan y Comisiwn Gamblo trwy drwyddedau gweithredwyr.

Mae'r Cyngor yn derbyn mai dim ond un dull o hyrwyddo cyflawni'r tri amcan yw'r swyddogaeth drwyddedu ac na ddylid ei gweld, felly, fel ffordd o ddatrys holl broblemau yn y gymuned. Bydd y Cyngor o'r herwydd yn parhau i weithio fel partner gydag awdurdodau cyfagos, Heddlu Dyfed Powys, busnesau lleol,

pobl leol a'r rhai sy'n ymwneud ag amddiffyn plant i hyrwyddo'r amcanion trwyddedu fel yr amlinellwyd. Yn ogystal, mae'r Cyngor yn cydnabod ei ddyletswydd dan Adran 17 o Ddeddf Trosedd ac Anhrefn 1998 o ran atal trosedd ac anhrefn.

1.5 Ymgynghori

Mae'r Cyngor wedi ymgynghori'n eang ar y Datganiad hwn cyn ei derfynu a'i gyhoeddi. Isod mae rhestr o'r bobl hynny yr ymgynghorwyd â hwy, yn unol â'r Ddeddf a'r Canllawiau. Mae rhagor o fanylion, ynghyd â rhestr o sylwadau a wnaed ac ystyriaeth y Cyngor o'r sylwadau hynny i'w cael ar gais.

- Prif Swyddog yr Heddlu;
- Yr Awdurdod Tân;
- Cynrychiolwyr deiliaid amrywiol drwyddedau ar gyfer eiddo yn y Sir fydd yn teimlo effaith y Polisi hwn;
- Cyrff yn cynrychioli busnesau a thrigolion yn y Sir;
- Adrannau (gan gynnwys awdurdodau cyfrifol) o fewn y Cyngor gyda diddordeb mewn trwyddedu gamblo;
- Bwrdd Lleol Diogelu Plant;
- Cynghorwyr Sir;
- Cynghorau Tref a Chymuned;
- Cyrff eraill a allai deimlo effaith materion trwyddedu yn y Datganiad hwn;
- Cyllid a Thollau EM.

Bu ymgynghori rhwng Gorffennaf 2015 a Medi 2015 ac, i'r graddau y mae'n ymarferol, dilynodd y Cyngor yr Egwyddorion Ymgynghori a gyhoeddwyd gan y llywodraeth ym mis Hydref 2013 sydd ar gael yn <https://www.gov.uk/government/publications/consultation-principles-guidance>

Cymeradwyodd y Cyngor y Polisi ar 30^{ain} Tachwedd 2015, ac mae'n dod i rym ar 31^{ain} Ionawr 2016, yn ogystal â bod ar gael yn www.pembrokeshire.gov.uk

1.6 Awdurdodau Cyfrifol

Wrth arfer pwerau'r Cyngor dan Adran 157(h) o'r Ddeddf i ddynodi, yn ysgrifenedig, corff sy'n gymwys i gynghori'r Cyngor ynghylch gwarchod plant rhag niwed, cymhwyswyd yr egwyddorion canlynol:

- Yr angen i'r corff fod yn gyfrifol am ardal sy'n cwmpasu tiriogaeth gyfan y Cyngor;
- Yr angen i'r corff gynnwys cynrychiolwyr uwch a chyfrifol cyrff cyhoeddus priodol yn y Sir, sydd â chyfrifoldeb dros warchod plant rhag niwed fel prif ddyletswydd.

Yn unol â'r Canllawiau mae'r Cyngor hwn yn dynodi'r Isadran Gwasanaethau Plant i'r diben hwn. Mae manylion y cyrff a ddynodwyd dan y Ddeddf sydd i'w trin fel awdurdodau cyfrifol ar gael trwy wefan y Cyngor.

1.7 Rhai â Diddordeb

Fe all rhai â diddordeb wneud sylwadau ar geisiadau am drwydded, neu wneud cais am adolygiad o drwydded bresennol ar sail y tri amcan trwyddedu sy'n cael eu manylu ym mharagraff 1.3 o'r Datganiad Polisi hwn.

Rhywun â diddordeb yw rhywun sydd:

- (a) yn byw'n ddigon agos at yr eiddo i fod yn debygol o deimlo effaith y gweithgareddau awdurdodedig;
- (b) â buddiannau busnes a allai deimlo effaith y gweithgareddau awdurdodedig; neu
- (c) yn cynrychioli pobl yn un o'r ddau grŵp uchod.

Yr egwyddorion fydd yn cael eu defnyddio gan y Cyngor wrth benderfynu a yw rhywun yn rhywun â diddordeb yw'r canlynol.

Bydd pob achos yn cael ei benderfynu yn ôl ei deilyngdod. Ni fydd y Cyngor hwn yn defnyddio rheol anhyblyg wrth benderfynu. Bydd yn ystyried enghreifftiau o ystyriaethau a ddarparwyd yn y Canllawiau. Bydd hefyd yn ystyried y Canllawiau y dylid rhoi'r dehongliad ehangaf posibl ar "fuddiannau busnes", gan gynnwys partneriaethau, elusennau, grwpiau crefyddol a phractisiau meddygol.

Fe all rhai â diddordeb fod yn bobl a etholwyd yn ddemocrataidd, fel Cynghorwyr ac AS. Ni fydd angen tystiolaeth benodol o gael cais i gynrychioli rhywun â diddordeb cyn belled â bod y Cynghorydd / AS yn cynrychioli'r ward sy'n debygol o deimlo'r effaith. Yn yr un modd, bydd Cynghorau Tref a Chymuned sy'n debygol o gael eu heffeithio'n cael eu hystyried fel rhai â diddordeb. Heblaw'r rhain, fodd bynnag, bydd y Cyngor hwn, yn gyffredinol, yn gofyn am dystiolaeth ysgrifenedig bod rhywun, corff (e.e. eiriolwr / perthynas) yn 'cynrychioli' rhywun sydd naill ai'n byw'n ddigon agos at yr eiddo i fod yn debygol o deimlo effaith y gweithgareddau awdurdodedig a/neu fuddiannau busnes a allai deimlo effaith y gweithgareddau awdurdodedig. Mae gohebiaeth oddi wrth un o'r bobl hyn, yn gofyn am y gynrychiolaeth, yn ddigonol.

Os yw unigolion eisiau cysylltu â Chynghorwyr i ofyn iddynt gynrychioli eu barn, dylid gofalu nad yw'r Cynghorwyr yn rhan o'r Is-bwyllgor Trwyddedu sy'n delio â'r cais am drwydded nac mewn unrhyw ffordd arall yn rhywun gyda budd a fyddai'n rhwystro iddynt gyfranogi mewn gwrandawriad. Os oes unrhyw amheuan, dylid cysylltu â'r Tîm Trwyddedu.

1.8 Cyfnewid Gwybodaeth

Yr egwyddor y bydd y Cyngor yn ei defnyddio o ran cyfnewid gwybodaeth rhyngddo a'r Comisiwn Gamblo a'r cyrff hynny sy'n cael eu rhestru yn Atodlen 6 i'r Ddeddf yw y bydd yn gweithredu'n unol â darpariaethau'r Ddeddf sy'n cynnwys y ddarpariaeth na fydd Deddf Gwarchod Data 1998 yn cael ei thorri. Bydd y Cyngor hefyd yn ystyried unrhyw ganllawiau a gyhoeddwyd gan y Comisiwn Gamblo i awdurdodau trwyddedu ar y mater hwn, yn ogystal ag unrhyw Reoliadau perthnasol a gyhoeddwyd gan yr Ysgrifennydd Gwladol dan y pwerau a ddarparwyd yn y Ddeddf.

1.9 Gorfodi

Egwyddorion y Cyngor yw y bydd yn cael ei arwain gan y Canllawiau, Cod y Rheolyddion a Pholisi Gorfodi'r Adran. Bydd yn ceisio bod:

- Yn gymesur: ni ddylai rheolyddion ymyrryd ond pan fo angen, dylai rhwymedïau fod yn briodol i'r perygl, a dylai costau gael eu nodi a'u lleihau i'r eithaf;
- Yn atebol: rhaid i reolyddion allu cyfiawnhau penderfyniadau, a bod yn agored i archwiliad cyhoeddus;
- Yn gyson: rhaid i reolau a safonau fod yn gysylltiedig, a chael eu gweithredu'n deg;
- Yn agored: dylai rheolyddion fod yn agored, cadw rheoliadau'n syml ac ystyriol o ddefnyddwyr; ac
- Wedi'i dargedu: dylid canolbwyntio rheoleiddiad ar y broblem, a lleihau sgil effeithiau gymaint â phosibl.

Ar sail y Canllawiau, bydd y Cyngor yn ceisio osgoi ailadrodd cyfundrefnau rheoleiddiol eraill cyn belled ag y bo modd.

Mae'r Cyngor wedi mabwysiadu a gweithredu rhaglen archwilio ar sail risg, wedi'i seilio ar y canlynol:

- Yr amcanion trwyddedu;
- Codau ymarfer perthnasol;
- Canllawiau'r Comisiwn Gamblo, Rhan 36 yn arbennig;
- Yr egwyddorion yn y Datganiad o Bolisi Trwyddedu hwn;
- Polisi Gorfodi'r Adran.

Prif swyddogaeth orfodi a chydymffurfio'r Cyngor hwn o ran y Ddeddf yw sicrhau cydymffurfio â'r trwyddedau eiddo a chaniatâd arall sy'n cael eu hawdurdodi ganddo. Y Comisiwn Gamblo yw corff gorfodi'r trwyddedau gweithredwr a phersonol. Y Cyngor sy'n trin pryderon ynghylch gweithgynhyrchu, cyflenwi neu drwsio peiriannau gamblo ond dylid eu hysbysu i'r Comisiwn Gamblo.

Bydd y Cyngor yn ystyried canllawiau diweddaraf y Comisiwn Gamblo, 'Dulliau Prawf-brynu', a gyhoeddwyd ym mis Chwefror 2015 (neu unrhyw

newidiadau dilynol) wrth ystyried prawf-brynu mewn eiddo gamblo. Bydd y Cyngor hefyd yn dilyn ei bolisïau a'i weithdrefnau ei hun o ran defnyddio prawf-brynwyr dan oed.

Mae'r Cyngor hefyd yn cadw ar y blaen i ddatblygiadau o ran gwaith y Swyddfa Rheoliadau Gwell ar ystyried swyddogaethau rheoleiddiol awdurdodau lleol.

1.10 Hawliau Sylfaenol

Yn ôl telerau'r Ddeddf gall unrhyw unigolyn neu gwmni wneud cais am amrywiaeth o ganiatâd a chael ystyried eu ceisiadau ar sail eu teilyngdod eu hunain. I'r un graddau, mae gan unrhyw un â diddordeb neu awdurdod cyfrifol hawl i wneud sylwadau perthnasol ar gais neu ofyn am adolygu trwydded neu dystysgrif pan fo darpariaeth iddynt wneud hynny yn y Ddeddf.

Mae gan geiswyr a'r rhai'n gwneud sylwadau perthnasol o ran ceisiadau i'r Cyngor hawl i wneud apêl i'r Llysoedd Ynadon yn erbyn penderfyniadau'r Cyngor.

1.11 Cyfannu Strategaethau ac Osgoi Ailadrodd

Trwy ymgynghori'n eang cyn cyhoeddi'r Datganiad Polisi hwn, bydd y Cyngor yn rhoi ystyriaeth lawn i bolisïau lleol ar atal trosedd, diwylliant, cludiant, cynllunio a thwristiaeth fel rhan o strategaeth gyfannol ar gyfer y Cyngor, yr Heddlu ac asiantaethau eraill. Efallai nad yw llawer o'r strategaethau hyn yn uniongyrchol berthnasol i hyrwyddo'r tri amcan trwyddedu, ond gallant effeithio'n anuniongyrchol arnynt.

Wrth ystyried unrhyw gais, bydd y Cyngor yn osgoi ailadrodd cyfundrefnau rheoleiddiol eraill cyn belled ag y bo modd. Felly, ni fydd y Cyngor yn ychwanegu amodau at drwydded oni bai eu bod yn cael eu hystyried yn angenrheidiol, rhesymol a chymesur i ddefnyddio eiddo ar gyfer gamblo yn gyson â'r amcanion trwyddedu.

1.12 Strategaeth Gymunedol Datblygu Cynaliadwy

Mae Deddf Llywodraeth Leol 2000 yn gofyn bod holl awdurdodau lleol yn cynhyrchu strategaeth gymunedol o fewn fframwaith Strategaeth Datblygu Cynaliadwy'r DU – "Gwell Ansawdd Bywyd" a strategaethau rhanbarthol perthnasol.

Mae strategaethau cymunedol yn rhoi canolbwynt i nodi materion ac uchelgeisiau lleol ar gynhwysiad cymdeithasol, diogelu'r amgylchedd, cyflogaeth a datblygu economaidd.

Mae partneriaethau strategol lleol, yn nodweddiadol yn cynnwys yr Heddlu, awdurdodau lleol, byrddau iechyd lleol, a chynrychiolwyr addysg, busnes a'r mudiadau yn y sector gwirfoddol, yn gyfrifol am gyflawni amcanion a bennwyd yn lleol.

Dan Ddeddf Trosedd ac Anhrefn 1998 rhaid i awdurdodau lleol ystyried effaith debygol arfer eu swyddogaethau ar drosedd ac anhrefn yn y cylch, a gwneud gymaint ag y gallant i'w atal. Bydd y Cyngor yn rhoi ystyriaeth arbennig i effaith debygol trwyddedu ar drosedd ac anhrefn cysylltiedig yn y Sir, yn enwedig wrth ystyried lleoliad, effaith, gweithrediad a rheolaeth holl geisiadau arfaethedig am drwyddedau / hawlenni, adnewyddiadau ac amrywio amodau.

2. Trwyddedau Eiddo

2.1 Egwyddorion Cyffredinol

Mae trwyddedau eiddo'n amodol ar ofynion y Ddeddf a Rheoliadau, yn ogystal ag amodau gorfodol a diofyn penodol, sy'n cael eu manylu mewn Rheoliadau a gyhoeddwyd gan yr Ysgrifennydd Gwladol. Mae awdurdodau trwyddedu'n gallu eithrio amodau diofyn a gosod rhai eraill hefyd, pan fo hynny'n cael ei ystyried yn briodol.

Wrth wneud penderfyniadau ar drwyddedau eiddo mae'r Cyngor yn ymwybodol y dylai amcanu at ganiatáu defnyddio eiddo ar gyfer gamblo i'r graddau y mae'n meddwl bod hynny:

- yn unol ag unrhyw god ymarfer perthnasol a gyhoeddwyd gan y Comisiwn Gamblo;
- yn unol ag unrhyw ganllawiau perthnasol a gyhoeddwyd gan y Comisiwn Gamblo;
- yn cyd-fynd o fewn rheswm â'r amcanion trwyddedu; ac
- yn unol â'r Datganiad Polisi hwn.

Ar sail y Canllawiau, rhaid derbyn nad yw "gwrthwynebiadau moesol yn erbyn gamblo'n rheswm dilyn dros wrthod ceisiadau am drwyddedau eiddo" a hefyd nad yw galw heb ei ateb yn faen prawf i awdurdod trwyddedu.

Mae'r "amodau trwydded a chod ymarfer" (LCCP) a gyhoeddwyd gan y Comisiwn Gamblo gan ddechrau ym mis Mai 2015 yn rhoi cyfrifoldeb ychwanegol ar eiddo i wneud asesiadau risg ar sail cod 8, y cod cyfrifoldeb cymdeithasol. Bydd y Cyngor yn cadw'r cod hwn mewn cof wrth ystyried ceisiadau. Caiff hyn ei drin yn fanwl yn Adran 6 y Datganiad hwn.

Diffinio "Eiddo":

Diffiniwyd eiddo yn y Ddeddf fel "unrhyw fan". Felly, mae Adran 152 yn atal rhag bod mwy nag un drwydded eiddo'n berthnasol i unrhyw fan. Ond gallai fod mwy nag un drwydded eiddo'n berthnasol i adeilad unigol, ond eu bod ar gyfer gwahanol rannau o'r adeilad a bod modd ystyried gwahanol rannau'r adeilad o fewn rheswm fel gwahanol eiddo. Cymrwyd yr agwedd hon er mwyn caniatáu i eiddo mawr, aml-uned fel parc difyrion, pier, trac neu farchnadfa

gael trwyddedau eiddo ar wahân, pan fo dulliau diogelu priodol yn bodoli. Fodd bynnag, dylai awdurdodau trwyddedu roi sylw arbennig os oes materion cysylltiedig ag israniadau o adeilad neu lain unigol a dylai sicrhau bod amodau gorfodol cysylltiedig â mynediad rhwng eiddo'n cael eu cadw.

Mae'r Comisiwn Gamblo'n datgan yn ei Ganllawiau: "Yn y rhan fwyaf o achosion y disgwyl yw mai adeilad / llain unigol fydd yn destun cais am drwydded. Ond nid yw hynny'n golygu na all llain adeilad unigol fod yn destun trwyddedau eiddo ar wahân, e.e. yr islawr a'r llawr isaf, os cânt eu trefnu'n dderbyniol. Yr amgylchiadau fydd yn penderfynu a yw'n briodol ystyried gwahanol rannau o adeilad yn eiddo ar wahân. Mae'n amlwg y bydd lleoliad yr eiddo'n ystyriaeth bwysig ac mae addasrwydd y rhaniad yn debygol o fod yn fater i'w drafod rhwng y gweithredwr a'r swyddog trwyddedu.

Fodd bynnag, nid yw'r Comisiwn yn ystyried bod modd ystyried rhannau o adeilad sy'n cael eu gwahanu'n artiffisial neu dros dro, er enghraifft, gyda rhaffau neu barwydydd symudol, yn briodol fel gwahanol eiddo".

Mae'r Cyngor yn sylwi'n arbennig ar y Canllawiau sy'n datgan y dylai awdurdodau trwyddedu gymryd gofal arbennig wrth ystyried ceisiadau am drwyddedau lluosog ar gyfer adeilad a'r rhai perthnasol i ran arwahanol o adeilad sy'n cael ei ddefnyddio at ddibenion eraill (heblaw gamblo). Yn arbennig, dylent fod yn ymwybodol o'r canlynol –

- Mae'r trydydd amcan trwyddedu'n ceisio gwarchod plant rhag niwed oherwydd gamblo. Yn ymarferol mae hynny'n golygu nid yn unig eu hatal rhag cymryd rhan mewn gamblo, ond hefyd yn eu hatal rhag bod yn agos at y gamblo. Felly, dylid cynllunio eiddo fel nad yw plant yn cael eu gwahodd i gymryd rhan mewn gamblo, yn cael mynediad damweiniol ato nac yn gallu gwylio gamblo'n agos lle cânt eu gwahardd rhag cyfranogi;
- Dylai mynedfeydd i ac allanfeydd o rannau o adeilad sydd dan un neu fwy o drwyddedau eiddo fod ar wahân ac adnabyddadwy fel nad yw gwahaniad gwahanol eiddo'n cael ei danseilio ac nad yw pobl yn cael eu hunain mewn ardal lle mae gamblo. Yn y cyd-destun hwn dylai fel arfer fod modd cyrraedd yr eiddo heb fynd drwy eiddo trwyddedig arall neu eiddo gyda hawlen;
- Dylai cwsmeriaid allu cymryd rhan yn y gweithgaredd sy'n cael ei enwi ar y drwydded eiddo.

Mae'r Canllawiau hefyd yn rhoi rhestr o ffactorau y dylai'r awdurdod trwyddedu fod yn ymwybodol ohonynt, all gynnwys y canlynol:

- A oes gan yr eiddo gofrestrriad ar wahân ar gyfer trethi busnes?
- A yw eiddo cyfagos i'r eiddo dan sylw yn yr un berchenogaeth neu ym mherchenogaeth rhywun arall?
- A oes modd cyrraedd pob eiddo o'r stryd neu dramwyfa gyhoeddus?
- Ai o eiddo gamblo arall yn unig y mae modd cyrraedd yr eiddo dan sylw?

2.2 Amgylchedd Briodol i Drwydded

Mae'r Canllawiau a'r LCCP, sy'n dechrau ym mis Mai 2015, yn nodi materion ychwanegol y dylai'r Cyngor eu cyfrif wrth ystyried ceisiadau am drwyddedau eiddo.

Mae Adran 19 y Canllawiau, Amod 16 LCCP a Chod 9 yn pennu cyfyngiadau ar weithgareddau gamblo mewn eiddo, gynt yn dwyn yr enw prif weithgaredd gamblo. Bydd y Cyngor yn ystyried unrhyw gais ar sail y darpariaethau yn y codau a'r canllawiau hyn.

Pan fo cyfleusterau gamblo'n cael eu darparu mewn eiddo fel gweithgaredd atodol i brif ddiben yr eiddo, e.e. safleoedd gwasanaethau traffyrdd a marchnadfeydd, bydd y Cyngor yn disgwyl bod yr ardal gamblo'n cael ei diffinio'n eglur i sicrhau bod cwsmeriaid yn gwbl ymwybodol eu bod yn gwneud dewis i fynd i mewn i'r eiddo gamblo, a bod yr eiddo dan oruchwyliaeth ddigonol bob amser.

Bydd y Cyngor yn ystyried y rhain ac unrhyw ffactorau perthnasol eraill wrth wneud ei benderfyniad, yn dibynnu ar holl amgylchiadau'r achos.

Caiff Canllawiau'r Comisiwn Gamblo ar ddarpariaethau mynediad perthnasol ar gyfer pob math o eiddo eu cyflwyno yn Atodiad A.

2.3 Eiddo “yn barod ar gyfer gamblo”

Mae'r Canllawiau'n datgan na ddylid rhoi trwydded i ddefnyddio eiddo ar gyfer gamblo heblaw bod yr awdurdod trwyddedu'n gallu bod yn fodlon y bydd yr eiddo'n barod i'w ddefnyddio ar gyfer gamblo yn y dyfodol agos o fewn rheswm, yn gyson â faint o adeiladu neu addasiadau sydd eu hangen cyn dechrau defnyddio'r eiddo.

Os na orffennwyd adeiladu eiddo eto, neu os oes angen ei addasu, neu os nad oes gan y ceisydd eto hawl i feddiannu'r eiddo, yna dylid gwneud cais am ddatganiad darpariaethol yn hytrach.

Wrth benderfynu a oes modd rhoi trwydded eiddo pan fo gwaith adeiladu neu addasu eto i'w wneud mewn eiddo, bydd y Cyngor yn penderfynu ceisiadau yn ôl eu teilyngdod, gan ddefnyddio proses ystyried dau gam:

- Yn gyntaf, a ddylid caniatáu defnyddio'r eiddo ar gyfer gamblo;
- Yn ail, a oes modd pennu amodau priodol i ddarparu ar gyfer y sefyllfa nad yw'r eiddo eto yn y cyflwr y dylai fod ynddo cyn bod gamblo'n digwydd.

Dylai ceiswyr sylwi bod gan yr Awdurdod hwn hawl i benderfynu ei bod yn briodol rhoi trwydded gydag amodau, ond nad yw'n gorfod rhoi trwydded o'r fath.

Mae enghreifftiau manylach o'r amgylchiadau sy'n caniatáu rhoi trwydded o'r fath i'w cael yn y Canllawiau.

2.4 Ystyriaethau Eraill

Lleoliad

Mae'r Cyngor yn ymwybodol nad oes modd ystyried materion galw o ran lleoliad eiddo ond bod ystyriaethau o ran yr amcanion trwyddedu'n berthnasol i'w benderfyniad. Ar sail y Canllawiau, bydd y Cyngor yn sylwi'n arbennig ar warchod plant a phobl ddiamddiffyn rhag bod gamblo'n peri niwed iddynt neu'n camfanteisio arnynt, yn ogystal â materion trosedd ac anhrefn. Os bydd penderfyniad ar unrhyw bolisi penodol o ran ardaloedd lle na ddylid lleoli eiddo gamblo, bydd y Datganiad hwn yn cael ei ddiweddarau. Dylid nodi nad yw unrhyw bolisi o'r fath yn rhwystro rhag gwneud unrhyw gais a bydd pob cais yn cael ei benderfynu yn ôl ei deilyngdod, gyda'r cyfrifoldeb ar y ceisydd i ddangos sut mae modd goresgyn pryderon all fod.

Cynllunio

Mae'r Canllawiau'n datgan:

- Wrth benderfynu ceisiadau mae dyletswydd ar yr awdurdod trwyddedu i ystyried holl faterion perthnasol a pheidio ag ystyried unrhyw faterion amherthnasol, h.y. rhai nad ydynt yn berthnasol i'r gamblo a'r amcanion trwyddedu. Un enghraifft o fater amherthnasol fyddai'r tebygolrwydd y byddai'r ceisydd yn cael caniatâd cynllunio neu gymeradwyaeth rheoliadau adeiladu ar gyfer eu cynnig.

Ni fydd y Cyngor yn ystyried materion amherthnasol ar sail y Canllawiau uchod. Yn ogystal, mae'r Cyngor yn nodi'r dyfyniad canlynol o'r Canllawiau:

- Wrth ddelio â chais am drwydded eiddo ar gyfer adeiladau gorffenedig, ni ddylai'r awdurdod trwyddedu ystyried a yw'r adeiladau hynny'n gorfod neu eisoes wedi cydymffurfio â'r caniatâd cynllunio neu adeiladu angenrheidiol. Dylid delio â'r materion hynny dan bwerau perthnasol rheoli cynllunio a rheoli adeiladu, yn hytrach na ffurfio rhan o'r ystyriaeth ar gyfer trwydded yr eiddo. Mae Adran 210 o'r Ddeddf yn atal awdurdodau trwyddedu rhag ystyried y tebygolrwydd y bydd cynnig y ceisydd yn cael caniatâd cynllunio neu adeiladu wrth ystyried cais am drwydded eiddo. I'r un graddau nid yw rhoi trwydded eiddo gamblo'n peryglu nac yn atal unrhyw weithred all fod yn briodol dan y gyfraith gysylltiedig â chynllunio neu adeiladu.

2.5 Ailadrodd cyfundrefnau rheoleiddiol eraill

Mae'r Cyngor yn ceisio osgoi ailadrodd unrhyw gyfundrefnau statudol / rheoleiddiol eraill lle bo modd, gan gynnwys cynllunio. Ni fydd y Cyngor yn ystyried a yw cais am drwydded yn debygol o gael caniatâd cynllunio neu gymeradwyaeth rheoliadau adeiladu pan fydd yn ei ystyried. Serch hynny,

bydd yn gwrando ar, ac yn ystyried yn ofalus, unrhyw bryderon ynghylch amodau nad yw trwyddedeion yn gallu eu cyflawni oherwydd cyfyngiadau cynllunio, pe bai'r fath sefyllfa'n codi.

Wrth ddelio â chais am drwydded eiddo ar gyfer adeiladau gorffenedig, ni fydd y Cyngor yn ystyried a yw'r adeiladau hynny'n gorfod cydymffurfio â'r caniatâd cynllunio neu adeiladu angenrheidiol. Ni fydd peryglon tân neu iechyd a diogelwch yn cael eu hystyried, oherwydd bod y materion hyn yn cael eu trin dan reolaeth gynllunio, adeiladau a rheoliadau eraill perthnasol a rhaid iddynt beidio â ffurfio rhan o'r ystyriaeth ar gyfer trwydded yr eiddo.

2.6 Amcanion Trwyddedu

Rhaid i drwyddedau eiddo sy'n cael eu rhoi gyd-fynd o fewn rheswm â'r amcanion trwyddedu. O ran yr amcanion hyn, mae'r Cyngor wedi ystyried y Canllawiau a chaiff rhai sylwadau eu gwneud isod.

Atal gamblo rhag bod yn ffynhonnell trosedd neu anhrefn, bod yn gysylltiedig â throsedd neu anhrefn neu gael ei ddefnyddio i gynorthwyo trosedd

Mae'r Cyngor yn ymwybodol fod y Comisiwn Gamblo'n cymryd rhan flaenllaw mewn atal gamblo rhag bod yn ffynhonnell trosedd. Fodd bynnag, mae'r Canllawiau'n rhagweld y dylai awdurdodau trwyddedu roi sylw i leoliad arfaethedig eiddo gamblo o ran yr amcan trwyddedu hwn. Felly, pan fo llawer o droseddau cyfundrefnol yn hysbys mewn ardal, bydd y Cyngor yn ystyried yn ofalus a yw'n addas lleoli eiddo gamblo yno ac a fyddai'n addas pennu amodau fel darparu porthorion. Mae'r Cyngor yn ymwybodol o'r gwahaniaeth rhwng anhrefn a niwsans a bydd yn ystyried ffactorau fel: a oedd angen cymorth yr Heddlu a pha mor fygythiol oedd yr ymddygiad i'r rhai oedd yn gallu ei weld, er mwyn gwahaniaethu felly. Nid oes modd rhoi sylw i faterion niwsans drwy ddarpariaethau Deddf Gamblo.

Sicrhau bod gamblo'n cael ei gynnal mewn ffordd deg ac agored

Mae'r Cyngor wedi nodi bod y Comisiwn Gamblo'n datgan nad yw'n disgwyl i awdurdodau trwyddedu ymwneud â sicrhau bod gamblo'n cael ei gynnal mewn ffordd deg ac agored, oherwydd y bydd hyn yn cael sylw drwy drwyddedau gweithredu a phersonol. Fodd bynnag, mae mwy o swyddogaeth o ran traciau, sy'n cael ei hesbonio'n fanylach yn yr adran "traciau".

Gwarchod plant a phobl ddiamddiffyn eraill rhag bod gamblo'n peri niwed iddynt neu'n camfanteisio arnynt

Mae'r Cyngor wedi nodi bod y Canllawiau'n datgan bod yr amcan hwn yn golygu atal plant rhag cymryd rhan mewn gamblo (yn ogystal â chyfyngu ar hysbysebu fel nad yw cynhyrchion gamblo'n anelu at blant nac yn arbennig o ddeniadol iddynt). Felly, fel sy'n cael ei awgrymu yn y Canllawiau hyn, bydd y Cyngor yn ystyried a oes angen mesurau penodol mewn eiddo arbennig, o

ran yr amcan trwyddedu hwn. Gall mesurau priodol gynnwys goruchwyllo mynedfeydd / peiriannau, gwahanu ardaloedd, ac ati.

Mae'r Cyngor hefyd yn ymwybodol o'r Codau Ymarfer, y mae'r Comisiwn Gamblo'n eu cyhoeddi o ran yr amcan trwyddedu hwn, mewn cysylltiad ag eiddo ac adeiladau penodol.

O ran y term "pobl ddiamddiffyn" sylwyd nad yw'r Comisiwn Gamblo'n ceisio cynnig diffiniad ond mae'n datgan y "bydd, at ddibenion rheolaethol, yn tybio bod y grŵp hwn yn cynnwys pobl sy'n gamblo mwy nag sydd arnynt eisiau; pobl sy'n gamblo y tu hwnt i'w modd; a phobl na fydd efallai'n gallu gwneud penderfyniadau deallus neu gytbwys ynghylch gamblo oherwydd amhariad meddyliol, alcohol neu gyffuriau". Bydd y Cyngor yn ystyried yr amcan trwyddedu hwn yn ôl yr achos.

Mae Adran 7 o'r Canllawiau'n cyflwyno ystyriaethau sydd raid i weithredwr eu gwneud er mwyn gwarchod plant a phobl ifanc rhag mynd i eiddo gamblo.

Mae'r Amodau Trwydded a Chodau Ymarfer (LCCP) a gyhoeddwyd yn 2015 yn pennu sut mae gweithredwyr yn gorfod atal plant rhag defnyddio gweithgareddau gamblo gyda chyfyngiad oedran arnynt, yn enwedig lle trwyddedwyd peiriannau gamblo.

Yn arbennig, rhaid i weithredwyr sicrhau'r canlynol:

- bod holl staff yn cael eu hyfforddi;
- bod holl gwsmeriaid yn cael eu goruchwyllo pan fyddant mewn eiddo gamblo;
- bod ganddynt drefnau ar gyfer adnabod cwsmeriaid sydd mewn perygl o niwed cysylltiedig â gamblo.

Bydd y Cyngor yn disgwyl i holl weithredwyr fod â pholisïau a threfnau'n bodoli yn ôl gofynion LCCP ar gyfrifoldeb cymdeithasol i gwmpasu holl agweddau ar y Cod, yn arbennig cofnodion hyfforddi staff a chofnodion hunan-wahardd.

Mae darpariaethau pellach o ran hunan-wahardd a marchnata'n cael eu cynnwys yn y cod cyfrifoldeb cymdeithasol. Bydd y Cyngor yn ystyried holl amodau a chodau wrth ystyried ceisiadau neu wneud gweithgareddau gorfodi.

Mae adran 6 o'r Datganiad Polisi hwn yn rhoi rhagor o fanylion gan gynnwys gofynion y Cyngor mewn cysylltiad â'r LCCP.

2.7 Gwyllo Betio

Mae'r Cyngor yn annog, a bydd yn cynorthwyo, gweithredwyr lleol i greu a chynnal rhwydwaith rhannu gwybodaeth i drafod materion gamblwyr problemus sy'n cael eu hadnabod. Bydd hyn hefyd yn gyfle i weithredwyr drafod materion gyda'r swyddogion trwyddedu.

2.8 Amodau

Bydd unrhyw amodau ynghlwm wrth drwyddedau'n gymesur ac:

- yn berthnasol i'r angen i wneud yr adeilad arfaethedig yn addas fel cyfleuster gamblo;
- yn uniongyrchol berthnasol i'r eiddo a'r math o drwydded a geisiwyd;
- yn deg ac yn gysylltiedig o fewn rheswm â maint a math yr eiddo; ac
- yn rhesymol ar bob cyfrif arall.

Bydd penderfyniadau ar amodau unigol yn cael eu gwneud yn ôl yr achos, er y bydd y Cyngor yn ystyried defnyddio nifer o fesurau os bydd angen i'w weld, fel defnyddio goruchwylwyr, arwyddion priodol ar gyfer ardaloedd oedolion yn unig, ac ati. Caiff sylwadau penodol eu gwneud yn hyn o beth dan rai o'r mathau o drwydded isod. Bydd y Cyngor hefyd yn disgwyl i'r ceiswyr trwydded gynnig eu hawgrymiadau eu hunain ar sut mae modd cyflawni'r amcanion trwyddedu'n effeithiol.

Bydd y Cyngor hefyd yn ystyried mesurau penodol all fod yn ofynnol ar gyfer adeiladau sydd â thrwyddedau eiddo lluosog. Gall mesurau o'r fath gynnwys goruchwyllo mynedfeydd; gwahanu ardaloedd gamblo o ardaloedd eraill lle mae plant; a goruchwyllo peiriannau gamblo mewn eiddo lle nad yw gamblo'n benodol i oedolion er ceisio cyflawni'r amcanion trwyddedu. Mae'r materion hyn yn unol â'r Canllawiau.

Pan fo peiriannau categori C neu uwch ar gynnig mewn eiddo lle mae mynediad i blant, bydd y Cyngor hefyd yn sicrhau'r canlynol:

- bod holl beiriannau o'r fath yn cael eu lleoli mewn rhan o'r eiddo a wahanwyd o weddill yr eiddo gan rwystr adeileddol sy'n effeithiol i atal mynediad heblaw drwy fynedfa ddynodedig;
- mai dim ond oedolion sy'n cael mynediad i'r rhan lle mae'r peiriannau hyn;
- bod mynediad i'r ardal lle mae'r peiriannau'n cael ei oruchwyllo;
- bod yr ardal lle mae'r peiriannau hyn yn cael ei threfnu fel bod modd i'r staff neu ddeiliad y drwydded ei gwyllo; a
- wrth y fynedfa i unrhyw ardaloedd o'r fath ac oddi mewn iddynt fod rhybuddion yn amlwg yn dangos bod mynediad i'r ardal yn cael ei wahardd i rai dan 18.

Bydd yr ystyriaethau hyn yn berthnasol i eiddo, gan gynnwys adeiladau lle mae trwyddedau eiddo lluosog yn berthnasol.

Mae'r Cyngor yn ymwybodol y gall fod un neu fwy nag un drwydded eiddo'n berthnasol i draciau, ond bod pob trwydded yn berthnasol i rannau penodedig o'r trac. Ar sail y Canllawiau, bydd y Cyngor hwn yn ystyried yr effaith ar y trydydd amcan trwyddedu a'r angen i sicrhau bod mynedfeydd ar wahân i bob math o eiddo a bod plant yn cael eu gwahardd o ardaloedd gamblo lle nad ydynt yn cael mynediad.

Nodwyd bod amodau na all y Cyngor eu gosod ar drwyddedau eiddo, sef:

- Unrhyw amod ar y drwydded eiddo sy'n ei wneud yn amhosibl cydymffurfio ag amod trwydded weithredu;
- Amodau cysylltiedig â chategoriâu, niferoedd, neu ddull gweithrediad peiriannau gamblo;
- Amodau sy'n darparu bod aelodaeth o glwb neu gorff yn ofynnol (mae'r Ddeddf yn dileu'n benodol y gofyniad aelodaeth ar gasino a chlybiau bingo ac mae'r ddarpariaeth hon yn ei atal rhag cael ei adfer); ac
- Amodau mewn cysylltiad â maint betiau, ffioedd, ennill neu wobrau.

2.9 Porthorion

Yn ei Ganllawiau mae'r Comisiwn Gamblo'n cyngori os yw'n pryderu y gall eiddo ddenu anhrefn, neu fod yn agored i gynigion mynediad diawdurdod (e.e. gan blant a phobl ifanc), yna gall ofyn bod porthor yn rheoli mynedfeydd i'r eiddo, ac mae ganddo hawl i bennu trwydded eiddo i'r perwyl hwn.

Pan fydd penderfyniad bod goruchwyllo mynedfeydd / peiriannau'n briodol mewn achosion penodol, bydd angen ystyried a oes angen i oruchwylwyr fod â thrwydded Awdurdod y Diwydiant Diogelwch neu beidio. Ni fydd yn cael ei dybio'n ddiofyn bod angen iddynt fod yn drwyddedig oherwydd bod y gofynion statudol ar wahanol fathau o eiddo'n amrywio.

2.10 Canolfannau Gamblo Oedolion

Bydd y Cyngor yn ystyried yn benodol yr angen i warchod rhag bod gamblo'n peri niwed neu'n camfanteisio ar blant a phobl ddiamddiffyn a bydd yn disgwyl i'r ceisydd ddarbwyllo'r Cyngor y bydd mesurau digonol i sicrhau, er enghraifft, nad yw rhai dan 18 oed yn cael mynediad i'r eiddo.

Pan fo cyfleusterau gamblo'n cael eu darparu mewn eiddo fel gweithgaredd atodol i brif ddiben yr eiddo, e.e. safleoedd gwasanaethau traffyrdd a marchnadfeydd, bydd y Cyngor yn disgwyl bod yr ardal gamblo'n cael ei diffinio'n eglur i sicrhau bod cwsmeriaid yn gwbl ymwybodol eu bod yn gwneud dewis i fynd i mewn i'r eiddo gamblo a bod yr eiddo dan oruchwyliaeth ddigonol bob amser.

Gall y Cyngor hwn ystyried mesurau i gyflawni'r amcanion trwyddedu fel:

- Cynlluniau prawf oedran
- TCC
- Goruchwyllo mynedfeydd / ardaloedd peiriannau
- Gwahanu ardaloedd yn adeileddol
- Lleoliad y fynedfa
- Rhybuddion / arwyddion
- Oriau agor penodol
- Cynlluniau hunan-wahardd

- Darparu taflenni gwybodaeth / rhifau llinellau cymorth ar gyfer sefydliadau fel GamCare.

Ni yw'r rhestr hon yn orfodol, na chyflawn, ac yn arwyddo mesurau enghreifftiol yn unig.

2.11 Canolfannau Adloniant i'r Teulu (Trwyddedig)

Bydd y Cyngor yn ystyried yn benodol yr angen i warchod rhag bod gamblo'n peri niwed neu'n camfanteisio ar blant a phobl ddiamddiffyn a bydd yn disgwyl i'r ceisydd ddarbwylo'r Cyngor, er enghraifft, y bydd mesurau digonol i sicrhau, er enghraifft, nad yw rhai dan 18 oed yn cael mynediad i'r ardaloedd peiriannau gamblo oedolion yn unig.

Gall y Cyngor ystyried mesurau i gyflawni'r amcanion trwyddedu fel:

- Cynlluniau prawf oedran
- TCC
- Goruchwylio mynedfeydd / ardaloedd peiriannau
- Gwahanu ardaloedd yn adeileddol
- Lleoliad y fynedfa
- Rhybuddion / arwyddion
- Oriau agor penodol
- Cynlluniau hunan-wahardd
- Darparu taflenni gwybodaeth / rhifau llinellau cymorth ar gyfer sefydliadau fel GamCare.
- Mesurau / hyfforddiant ar gyfer staff ar sut i ddelio â phlant yn yr eiddo, er enghraifft, amau triwantiaeth o'r ysgol.

Ni yw'r rhestr hon yn orfodol, na chyflawn, ac yn arwyddo mesurau enghreifftiol yn unig.

Bydd y Cyngor, ar sail y Canllawiau, yn cyfeirio at wefan y Comisiwn i weld unrhyw amodau perthnasol i drwyddedau gweithredu ar gyfer sut ddylid dynodi'r ardal sy'n cynnwys y peiriannau categori C. Bydd y Cyngor hwn hefyd yn gwneud ei hun yn ymwybodol o unrhyw amodau gorfodol neu ddiofyn ar y trwyddedau eiddo hyn, ar ôl eu cyhoeddi.

2.12 Casinos

Ar hyn o bryd nid oes unrhyw gasinos yn gweithredu yn y Sir. Nid yw'r Awdurdod Trwyddedu hwn, fodd bynnag, wedi gwneud penderfyniad "dim casino" dan Adran 166 o'r Ddeddf ond mae'n ymwybodol fod ganddo'r pŵer i wneud hynny. Os bydd yr Awdurdod Trwyddedu hwn yn penderfynu gwneud penderfyniad o'r fath yn y dyfodol, bydd yn diweddarau'r Polisi hwn gyda manylion y penderfyniad hwnnw, yn dilyn ymgynghoriad llawn, cyn mabwysiadu'r ddarpariaeth. Bydd unrhyw benderfyniad o'r fath yn cael ei wneud gan y Cyngor Llawn.

2.13 Eiddo Bingo

Mae'r Cyngor hwn yn nodi bod y Canllawiau'n datgan:

"Bydd angen i awdurdodau trwyddedu fodloni eu hunain bod modd chwarae bingo yn unrhyw eiddo bingo a gafodd drwydded eiddo. Bydd hon yn ystyriaeth berthnasol pan fydd gweithredwyr eiddo bingo presennol yn gwneud cais i amrywio eu trwydded i gau allan rhan o'r eiddo presennol o'u cyfrifoldeb ac yna'n gwneud cais am drwydded eiddo newydd, neu drwyddedau lluosog, ar gyfer y rhannau hynny a gaewyd allan".

Mae'r Cyngor yn ymwybodol fod deiliaid trwyddedau eiddo bingo'n gallu rhoi nifer o beiriannau gamblo categori B ar gael i'w defnyddio, heb fod dros 20% o gyfanswm y peiriannau gamblo sydd ar gael i'w defnyddio yn yr eiddo.

Mae plant a phobl ifanc yn cael mynd i eiddo bingo; fodd bynnag, nid ydynt yn cael cymryd rhan yn y bingo ac, os oes peiriannau categori B neu C ar gael i'w defnyddio, rhaid gwahanu'r rhain o ardaloedd lle caiff plant a phobl ifanc fynd iddynt.

2.14 Eiddo Betio

Peiriannau betio

Mae'r Ddeddf yn darparu nad yw peiriant yn beiriant gamblo os cafodd ei lunio neu ei addasu i'w ddefnyddio i fetio ar ddigwyddiadau gwirioneddol yn y dyfodol. Gall eiddo betio gynnig peiriannau sy'n derbyn betiau ar ddigwyddiadau byw, fel rasio ceffylau, fel rhywbeth yn lle betio dros y cownter. Nid yw'r "peiriannau betio" hyn yn beiriannau gamblo; dim ond awtomeiddio proses y mae modd ei gwneud yn bersonol a wnânt, ac, felly, nid oes ar angen eu rheoli fel peiriannau gamblo.

Ar sail y Canllawiau, wrth ystyried nifer / natur / amgylchiadau peiriannau betio y mae gweithredwr eisiau eu cynnig, bydd y Cyngor yn ystyried maint yr eiddo, nifer y safleoedd cownter sydd ar gael ar gyfer trafodion unigolyn i unigolyn, a gallu staff i gadw golwg ar ddefnyddio'r peiriannau gan blant a phobl ifanc (mae'n drosedd i rai dan 18 fetio) neu gan bobl ddiamddiffyn. Dylid arddangos rhybuddion yn yr eiddo hefyd gyda chysylltiadau â sefydliadau cymorth, e.e. GamCare.

2.15 Traciau

Mae'r Cyngor yn ymwybodol y gall fod un neu fwy nag un drwydded eiddo'n berthnasol i draciau, ond bod pob trwydded yn berthnasol i rannau penodedig o'r trac. Ar sail y Canllawiau, bydd y Cyngor hwn yn ystyried yr effaith ar y trydydd amcan trwyddedu (h.y. gwarchod plant a phobl ddiamddiffyn rhag bod gamblo'n peri niwed iddynt neu'n camfanteisio arnynt) a'r angen i sicrhau bod mynedfeydd ar wahân i'r gwahanol fathau o eiddo a bod plant yn cael eu gwahardd o ardaloedd gamblo lle nad ydynt yn cael mynediad.

Felly, bydd y Cyngor yn disgwyl i'r ceisydd trwydded eiddo ddangos mesurau addas i sicrhau nad yw plant yn cael mynediad at gyfleusterau gamblo oedolion yn unig. Nodwyd y bydd plant a phobl ifanc yn cael mynd i mewn i rannau o draciau lle caiff cyfleusterau ar gyfer betio eu darparu ar ddiwrnodau pan fo rasio cŵn a/neu rasio ceffylau'n digwydd, ond eu bod yn dal i gael eu gwahardd rhag mynd i ardaloedd lle caiff peiriannau gamblo (heblaw peiriannau categori D) eu darparu.

Gall y Cyngor ystyried mesurau i gyflawni'r amcanion trwyddedu, fel:

- Cynlluniau prawf oedran
- TCC
- Goruchwylio mynedfeydd / ardaloedd peiriannau
- Gwahanu ardaloedd yn adeileddol
- Lleoliad y fynedfa
- Rhybuddion / arwyddion
- Oriau agor penodol
- Cynlluniau hunan-wahardd
- Darparu taflenni gwybodaeth / rhifau llinellau cymorth ar gyfer sefydliadau fel GamCare.

Ni yw'r rhestr yn orfodol, na chyflawn, ac yn arwyddo mesurau enghreifftiol yn unig.

2.16 Peiriannau Gamblo

Pan fo'r ceisydd yn dal trwydded i weithredu betio cronfa ac yn mynd i ddefnyddio'r hawl i bedwar peiriant gamblo, dylid lleoli peiriannau (heblaw peiriannau categori D) mewn ardaloedd lle gwaharddwyd plant.

2.17 Peiriannau Betio

Ar sail y Canllawiau, bydd y Cyngor yn ystyried maint yr eiddo a gallu staff i gadw golwg ar ddefnyddio peiriannau gan blant a phobl ifanc (mae'n drosedd i rai dan 18 fetio) neu gan bobl ddiamddiffyn, wrth ystyried nifer / natur / amgylchiadau peiriannau betio y mae gweithredwr eisiau eu cynnig.

2.18 Ceisiadau a chynlluniau

Mae'r Ddeddf (Adran 51) yn gofyn bod ceiswyr yn cyflwyno cynlluniau'r eiddo gyda'u ceisiadau, er mwyn sicrhau bod gan y Cyngor y wybodaeth angenrheidiol i farnu'n gytbwys a yw'r eiddo'n addas ar gyfer gamblo. Byddant yn cael eu defnyddio hefyd gan y Cyngor i drefnu archwiliadau eiddo'r dyfodol.

Dylai cynlluniau ar gyfer traciau gael eu tynnu ar raddfa sy'n ddigon manwl i gynnwys y wybodaeth ofynnol gan y Rheoliadau.

Gall rhai traciau fod ar dir amaethyddol lle nad oes wal neu ffens allanol yn diffinio'r terfyn, fel traciau rasio o fan i fan. Mewn achosion o'r fath, lle caiff tâl

mynediad ei godi, fe all deiliaid trwyddedau eiddo trac godi adeileddau dros dro i gyfyngu ar fynediad i'r eiddo.

Yn yr achosion prin pan nad oes modd diffinio'r terfyn allanol, mae'n debygol na fydd y trac dan sylw wedi cael ei lunio'n benodol ar gyfer cynnal digwyddiadau chwaraeon neu rasys yn aml. Mewn achosion o'r fath fe all fod yn well darparu cyfleusterau betio trwy rybuddion defnydd achlysurol lle nad oes angen diffinio terfynau'r eiddo.

Mae'r Cyngor yn derbyn ei bod weithiau'n anodd diffinio union leoliad ardaloedd betio ar draciau. Nid oes angen dangos yr union fan lle caiff cyfleusterau betio eu darparu ar gynlluniau traciau, yn rhinwedd y ffaith bod betio'n cael ei ganiatáu yn unrhyw ran o'r eiddo ac oherwydd yr anawsterau cysylltiedig â lleoli union fannau'n fanwl ar rai mathau o drac. Dylai ceiswyr roi gwybodaeth ddigonol i'r Cyngor hwn allu bodloni ei hun bod y cynllun yn dangos y prif ardaloedd lle gallai betio ddigwydd. O ran caeau rasys yn arbennig, rhaid dangos unrhyw ardal fetio sy'n amodol ar y "rheol pum gwaith" (yn cael eu galw'n gyffredin yn gylchoedd betio) ar y cynllun.

2.19 Ffeiriau Teithiol

Pan fo peiriannau categori D a/neu gamblo cyfle cyfartal am wobr heb hawlen i fod ar gael i'w defnyddio mewn ffeiriau teithiol, mae'r Cyngor hwn yn gyfrifol am benderfynu a yw'r gofyniad statudol bod y cyfleusterau ar gyfer gamblo'n dod i ddim mwy na difyrrwch ategol yn y ffair yn cael ei ateb.

Bydd y Cyngor hefyd yn ystyried a yw'r ceisydd o fewn diffiniad statudol ffair deithiol sydd yn Adran 286 o'r Ddeddf.

Nodwyd bod yr uchafswm statudol o 27 diwrnod ar y tir sy'n cael ei ddefnyddio fel ffair fesul blwyddyn galendr, a'i fod yn berthnasol i'r darn o dir lle bydd y ffeiriau'n cael eu cynnal, heb ystyried ai'r un ffair neu ffeiriau teithiol gwahanol sy'n meddiannu'r tir. Bydd y Cyngor yn gweithio gyda'i awdurdodau cyfagos i sicrhau bod tir sy'n croesi ffiniau'r Cyngor yn cael ei arolygu fel nad yw'r cyfyngiadau statudol yn cael eu torri.

2.20 Datganiadau Darpariaethol

Gall datblygwyr fod eisiau gwneud cais i'r Cyngor hwn am ddatganiadau darpariaethol cyn mynd i gontract i brynu neu brydlesu eiddo neu dir er mwyn barnu a yw'n werth dwyn datblygiad ymlaen yng ngoleuni'r angen i gael trwydded eiddo. Nid oes angen i'r ceisydd ddal trwydded weithredu er mwyn gwneud cais am ddatganiad darpariaethol.

Mae Adran 204 o'r Ddeddf yn darparu ar gyfer gwneud cais am ddatganiad darpariaethol i'r Cyngor gan rywun o ran eiddo:

- y mae'n disgwyl ei adeiladu;
- y mae'n disgwyl ei newid; neu
- y mae'n disgwyl cael hawl i'w feddiannu.

Mae'r broses ar gyfer ystyried cais am ddatganiad darpariaethol yr un fath â'r un ar gyfer cais am drwydded eiddo. Mae'n orfodol ar y ceisydd i roi rhybudd o'r cais yn yr un modd â gwneud cais am drwydded eiddo. Gall awdurdodau cyfrifol a rhai â diddordeb gyflwyno sylwadau ac mae hawliau i apelio.

Yn wahanol i'r cais am drwydded eiddo, nid yw'r ceisydd yn gorfod dal neu fod wedi gwneud cais am drwydded weithredu oddi wrth y Comisiwn Gamblo (heblaw yn achos trac) ac nid ydynt yn gorfod bod â hawl i feddiannu'r eiddo y mae'r cais yn cael ei wneud ar ei gyfer.

Yna gall deiliad datganiad darpariaethol wneud cais am drwydded eiddo unwaith y caiff yr eiddo ei adeiladu, ei newid neu ei gaffael. Bydd y Cyngor yn cael ei gyfyngu o ran y materion y gall eu hystyried wrth benderfynu'r cais am drwydded eiddo ac, o ran sylwadau ar geisiadau am drwydded eiddo sy'n dilyn caniatáu datganiad darpariaethol, nid oes modd ystyried sylwadau ychwanegol gan awdurdodau cyfrifol neu rai â diddordeb oni bai:

- eu bod yn ymwneud â materion na fyddai modd iddynt gael sylw ar adeg y datganiad darpariaethol; neu
- eu bod yn adlewyrchu newid yn amgylchiadau'r ceisydd.

Yn ogystal, gall y Cyngor wrthod y drwydded eiddo (neu ei rhoi ar delerau gwahanol i'r rhai a roddwyd ar y datganiad darpariaethol) yn unig drwy gyfeirio at faterion:

- na fyddai wedi gallu cael eu codi gan wrthwynebwyr ar adeg y datganiad darpariaethol;
- sydd ym marn y Cyngor yn adlewyrchu newid yn amgylchiadau'r gweithredwr; neu
- lle na chafodd yr eiddo ei adeiladu yn unol â'r cynllun a gyflwynwyd gyda'r cais. Rhaid i hyn fod yn newid sylweddol o'r cynllun ac mae'r Cyngor hwn yn nodi y gall drafod unrhyw bryderon sydd ganddo gyda'r ceisydd cyn gwneud penderfyniad.

3. Hawlenni / Rhybuddion Defnydd Achlysurol a Thros Dro

Mae tabl yn dangos hawl i beiriannau gamblo yn Atodiad D.

3.1 Hawlenni Peiriannau Gamblo mewn Canolfannau Didrwydded Adloniant i'r Teulu

Lle nad yw eiddo'n dal trwydded eiddo ond yn dymuno darparu peiriannau gamblo categori D, gall wneud cais i'r Cyngor am yr hawlen hon.

Dylid nodi bod y ceisydd yn gorfod dangos y bydd yr eiddo'n cael ei ddefnyddio, yn gyfan gwbl neu'n bennaf, i ddarparu peiriannau gamblo i'w

defnyddio a byddai, felly, yn gwahardd unrhyw eiddo a fyddai'n cael ei ddefnyddio'n bennaf at unrhyw ddibenion eraill, e.e. ffreuturau, bwyd sydyn i fynd, canolfannau hamdden, garejis a gorsafoedd petrol, a swyddfeydd tacsis.

Mae modd caniatáu cais am hawlen yn unig os yw'r Cyngor yn fodlon y bydd yr eiddo'n cael ei ddefnyddio fel canolfan ddidrwydded adloniant i'r teulu ac yr ymgynghorwyd â Phrif Swyddog yr Heddlu ynghylch y cais.

Bydd y Cyngor yn disgwyl i'r ceisydd ddangos bod polisïau a threfnau'n bodoli i amddiffyn plant rhag niwed. Yn y cyd-destun hwn nid yw niwed yn cael ei gyfyngu i niwed oherwydd gamblo ond mae'n cynnwys ystyriaethau ehangach amddiffyn plant. Bydd effeithlonrwydd polisïau a threfnau o'r fath yn cael ei ystyried yn ôl eu teilyngdod. Fodd bynnag, gallant gynnwys mesurau / hyfforddiant priodol i staff o ran amau plant ysgol triwant yn yr eiddo, mesurau / hyfforddiant yn cwmpasu sut fyddai staff yn delio â phlant ifanc iawn heb eu goruchwyllo yn yr eiddo, neu blant yn achosi problemau sydd i'w gweld yn / o gwmpas yr eiddo. Bydd disgwyl i geiswyr hawlen canolfan adloniant i'r teulu roi tystiolaeth y gwnaed gwiriad cofnod troseddol addas ar holl staff yn eu cyflogaeth.

Bydd y Cyngor hwn hefyd yn disgwyl, ar sail y Canllawiau, bod ceiswyr yn dangos y canlynol:

- Dealltwriaeth lawn o fetiau a gwobrau mwyaf y gamblo sy'n oddefadwy mewn canolfannau didrwydded adloniant i'r teulu;
- Nad oes gan y ceisydd euogfarnau perthnasol (y rhai sy'n cael eu rhestru yn Atodlen 7 i'r Ddeddf);
- Yr hyfforddwyd staff i fod â dealltwriaeth lawn o'r betiau a gwobrau mwyaf.

Dylid nodi na all y Cyngor bennu amodau ar y math hwn o hawlen.

3.2 Hawlenni Peiriannau Gamblo Eiddo Trwyddedig (Alcohol)

Mae darpariaeth yn y Ddeddf ar gyfer eiddo gyda thrwydded i werthu alcohol i'w yfed yn yr eiddo, i fod â 2 beiriant gamblo'n ddiofyn, o gategorïau C a/neu D. Nid oes ond angen i'r eiddo hysbysu'r Awdurdod Trwyddedu. Gall y Cyngor ddileu'r awdurdodiad diofyn o ran unrhyw eiddo arbennig:

- os nad yw darparu'r peiriannau'n cyd-fynd o fewn rheswm â cheisio dilyn yr amcanion trwyddedu;
- os yw gamblo wedi digwydd yn yr eiddo sy'n torri un o amodau Adran 282 o'r Ddeddf (h.y. y rhoddwyd rhybudd ysgrifenedig i'r awdurdod trwyddedu, y darparwyd ffi ac y cydymffurfiwyd ag unrhyw god ymarfer perthnasol a gyhoeddwyd gan y Comisiwn Gamblo ynghylch lleoliad a gweithrediad y peiriant);
- y caiff yr eiddo ei ddefnyddio'n bennaf ar gyfer gamblo; neu
- y bu trosedd dan Ddeddf Gamblo yn yr eiddo.

Os yw eiddo'n dymuno cael mwy na 2 beiriant, yna mae angen iddo wneud cais am hawlen a rhaid i'r Cyngor hwn ystyried y cais hwnnw ar sail yr amcanion trwyddedu, unrhyw ganllawiau a gyhoeddwyd gan y Comisiwn Gamblo dan adran 25 o'r Ddeddf, a'r "fath faterion ag yr ystyria'r Cyngor sy'n berthnasol". Mae'r Cyngor yn ystyried y bydd "materion o'r fath" yn cael eu penderfynu yn ôl yr achos ond, yn gyffredinol, bydd ystyriaeth o'r angen i warchod plant a phobl ddiamddiffyn rhag niwed neu gamfanteisio arnynt oherwydd gamblo a bydd y Cyngor yn disgwyl i'r ceisydd ei ddarbwyll y bydd mesurau digonol i sicrhau nad yw rhai dan 18 oed yn cael mynediad at y peiriannau gamblo oedolion yn unig. Y math o fesurau fydd yn bodloni'r Cyngor na fydd unrhyw fynediad yw bod y peiriannau oedolion yng ngolwg y bar, neu yng ngolwg staff fydd yn gweld nad yw rhai dan 18 oed yn defnyddio'r peiriannau. Gall rhybuddion ac arwyddion fod o gymorth hefyd. O ran diogelu pobl ddiamddiffyn, gall ceiswyr for eisiau ystyried darparu taflenni gwybodaeth / rhifau llinellau cymorth sefydliadau fel GamCare.

Mae'n cael ei dderbyn bod rhai eiddo trwyddedig ar gyfer alcohol yn gallu gwneud cais am drwydded eiddo ar gyfer eu hardaloedd heb drwyddedig alcohol. Mae'n fwyaf tebygol y byddai gwneud unrhyw gais o'r fath yn cael ei wneud a'i drin fel trwydded eiddo Canolfan Gamblo Oedolion.

Dylid nodi y gall y Cyngor benderfynu caniatáu'r cais gyda nifer llai o beiriannau a/neu wahanol gategori o beiriannau na'r hyn a geisiwyd. Nid oes modd pennu amodau (heblaw'r rhain).

Dylid nodi hefyd bod deiliad hawlen yn gorfod cydymffurfio ag unrhyw God Ymarfer a gyhoeddwyd gan y Comisiwn Gamblo ynghylch lleoliad a gweithrediad y peiriant.

3.3 Hawlenni Gamblo am Wobr

Mae gan y Cyngor hawl i baratoi 'Datganiad Egwyddorion' y mae'n bwriadu eu defnyddio wrth arfer ei swyddogaethau dan Atodlen 14 y Ddeddf sy'n gallu, yn arbennig, pennu materion y mae'r Awdurdod hwn yn bwriadu eu hystyried wrth benderfynu pa mor addas yw'r ceisydd i gael hawlen.

Mae'r Cyngor wedi paratoi 'Datganiad Egwyddorion', sef y dylai ceiswyr nodi mathau'r gamblo y maent yn bwriadu eu cynnig ac y dylent allu dangos y canlynol:

- Eu bod yn deall y terfynau ar fetiau a gwobrau sy'n cael eu cyflwyno mewn Rheoliadau;
- Bod y gamblo sy'n cael ei gynnig o fewn y gyfraith; a hefyd
- Bod polisiau eglur yn bodoli sy'n amlinellu'r camau i'w cymryd i amddiffyn plant rhag niwed.

Wrth wneud ei benderfyniad ar gais am yr hawlen hon nid yw'r Awdurdod Trwyddedu'n gorfod ystyried yr amcanion trwyddedu ond rhaid iddo ystyried unrhyw ganllawiau'r Comisiwn Gamblo.

Dylid nodi bod amodau yn y Ddeddf y mae deiliad yr hawlen yn gorfod cydymffurfio â nhw, ond na all yr Awdurdod Trwyddedu bennu amodau. Yr amodau yn y Ddeddf yw:

- Rhaid cydymffurfio â'r terfynau ar ffioedd cymryd rhan, yn ôl y Rheoliadau;
- Rhaid neilltuo holl gyfleoedd i gymryd rhan yn y gamblo yn yr eiddo lle mae'r gamblo'n digwydd ac ar un diwrnod; rhaid chwarae a gorffen y gêm ar y diwrnod y neilltuwyd y cyfleoedd; a rhaid cyhoeddi canlyniad y gêm yn yr eiddo ar y diwrnod y caiff ei chwarae;
- Rhaid i'r wobwr am y gêm beidio â bod yn fwy na'r swm sy'n cael ei bennu yn y Rheoliadau (os yw'n wobwr ariannol), neu'r gwerth a bennwyd (os yw'n wobwr heblaw arian); a
- Rhaid i gymryd rhan yn y gamblo beidio â rhoi hawl i'r chwaraewr gyfranogi mewn unrhyw gamblo arall.

3.4 Hawlenni Gamblo Clwb a Pheiriannau Clwb

Gall clybiau aelodau a sefydliadau lles glowyr (ond nid clybiau masnachol) wneud cais am hawlen gamblo clwb neu hawlen peiriannau gamblo clwb. Bydd yr hawlen gamblo clwb yn galluogi darparu peiriannau gamblo (3 pheiriant o gategorïau B, C neu D), gamblo siawns cyfartal a gemau siawns yn yr eiddo. Gall clybiau aelodau a sefydliadau glowyr a hefyd clybiau masnachol wneud cais am hawlen peiriannau clwb. Bydd hawlen peiriannau gamblo clwb yn galluogi darparu peiriannau gamblo (3 pheiriant o gategorïau B, C neu D) yn yr eiddo. Ni chaiff clybiau masnachol osod peiriannau gamblo categori B3A sy'n cynnig gemau loteri yn eu clwb.

Rhaid i'r Cyngor fodloni ei hun bod y clwb yn ateb gofynion y Ddeddf i gael hawlen gamblo clwb. Wrth wneud hynny bydd yn ystyried nifer o faterion fel yr amlinellwyd yn y Canllawiau. Mae'r rhain yn cynnwys cyfansoddiad y clwb, amllder y gamblo a sicrhau bod mwy na 25 o aelodau.

Rhaid cynnal y clwb "yn gyfan gwbl neu'n bennaf" at ddibenion heblaw gamblo, oni bai fod Rheoliadau ar wahân yn caniatáu'r gamblo. Mae'r Ysgrifennydd Gwladol wedi gwneud Rheoliadau ac mae'r rhain yn cwmpasu clybiau bridge a chwist.

Gall y Cyngor wrthod cais yn unig ar y seiliau canlynol:

- (a) Nid yw'r ceisydd yn ateb gofynion clwb aelodau neu fasnachol neu sefydliad lles glowyr ac, felly, nid oes ganddo hawl i dderbyn y math o hawlen y gwnaed cais amdani;
- (b) Mae eiddo'r ceisydd yn cael ei ddefnyddio'n gyfan gwbl neu'n bennaf gan blant a/neu bobl ifanc;
- (c) Mae'r ceisydd wedi troseddu dan y Ddeddf neu wedi torri'r hawlen wrth ddarparu cyfleusterau gamblo;
- (d) Cafodd hawlen a ddaliwyd gan y ceisydd ei dileu yn y deng mlynedd flaenorol; neu

(e) Cyflwynwyd gwrthwynebiad gan y Comisiwn neu'r Heddlu.

Mae gweithdrefn 'garlam' ar gael hefyd dan y Ddeddf ar gyfer eiddo sy'n dal tystysgrif eiddo clwb dan Ddeddf Trwyddedu 2003 (Atodlen 12 paragraff 10). Ni all clybiau masnachol ddal tystysgrifau eiddo clwb dan Ddeddf Trwyddedu 2003 ac, felly, ni allant ddefnyddio'r drefn garlam. Fel y dywed y Canllawiau: "Dan y weithdrefn garlam nid oes unrhyw gyfle i'r Comisiwn na'r heddlu wneud gwrthwynebiadau, ac mae llai o sail y gall Awdurdod wrthod hawlen arni" ac "y sail i wrthod cais dan y broses yw:

- (a) Y sefydlwyd y clwb yn bennaf ar gyfer gamblo, heblaw gamblo a bennwyd dan atodlen 12;
- (b) Yn ogystal â'r gamblo a bennwyd, bod y ceisydd yn darparu cyfleusterau ar gyfer gamblo arall; neu
- (c) Y cafodd hawlen gamblo clwb neu hawlen peiriannau clwb a roddwyd i'r ceisydd ei dileu yn y deng mlynedd diwethaf."

Mae amodau statudol ar hawlenni gamblo clwb na fydd dim plentyn yn defnyddio peiriant categori B neu C yn yr eiddo a bod y deiliad yn cydymffurfio ag unrhyw ddarpariaeth berthnasol o god ymarfer ynghylch lleoliad a gweithrediad peiriannau gamblo.

3.5 Rhybuddion Defnydd Dros Dro

Mae rhybuddion defnydd dros dro'n caniatáu defnyddio eiddo ar gyfer gamblo lle nad oes unrhyw drwydded eiddo ond lle mae gweithredwr gamblo'n dymuno defnyddio'r eiddo dros dro i ddarparu cyfleusterau ar gyfer gamblo. Yn ôl y Comisiwn Gamblo, byddai eiddo a allai fod yn addas ar gyfer rhybudd defnydd dros dro'n cynnwys gwestai, canolfannau cynadledda a chanolfannau chwaraeon.

Ni all y Cyngor ond rhoi rhybudd defnydd dros dro i unigolyn neu gwmni sy'n dal trwydded weithredu berthnasol, h.y. trwydded gweithredu casino heb fod o bell.

Mae gan yr Ysgrifennydd Gwladol bŵer i benderfynu pa ffurf ar gamblo y gall rhybuddion defnydd dros dro ei hawdurdodi ac, ar adeg ysgrifennu'r Datganiad hwn, mae'r Rheoliadau perthnasol (adran 1 rhif 3157: Rheoliadau (Rhybuddion Defnydd Dros Dro) Deddf Gamblo 2005 2007) yn datgan nad oes modd defnyddio rhybuddion defnydd dros dro ond i ganiatáu darparu cyfleusterau neu gamblo siawns cyfartal, pan fo bwriad y gamblo yw cynhyrchu un enillydd sydd, yn ymarferol, yn golygu twrnameintiau pocer.

Mae nifer o gyfyngiadau statudol ar rybuddion defnydd dros dro. Caiff ystyr "eiddo" yn Rhan 8 y Ddeddf ei drafod yn Rhan 7 o'r Canllawiau. Fel gydag "eiddo", bydd diffiniad "casgliad o eiddo" yn fater ffeithiol dan amgylchiadau arbennig pob rhybudd sy'n cael ei roi. Yn y Ddeddf, mae diffiniad "eiddo" yn cynnwys "unrhyw le". Wrth ystyried a yw lle yn dod o fewn diffiniad "casgliad o eiddo", mae angen i'r Cyngor edrych ar berchenogaeth / daliadaeth a rheolaeth yr eiddo, ymhlith pethau eraill.

Mae'r Cyngor hwn yn disgwyl gwrthwynebu rhybuddion pan fo'n ymddangos mai eu heffaith fyddai caniatáu gamblo rheolaidd mewn man y byddai modd ei ddisgrifio fel un casgliad o eiddo; yn ôl cymeradwyaeth y Canllawiau.

3.6 Rhybuddion Defnydd Achlysurol

Ychydig iawn o ddewis sydd gan y Cyngor o ran y rhybuddion hyn heblaw sicrhau na chaiff y terfyn statudol o 8 diwrnod mewn blwyddyn galendr ei dorri. Serch hynny, bydd y Cyngor yn ystyried diffiniad 'trac' ac a yw ceiswyr yn cael manteisio ar y rhybudd.

4. Loteriau Cymdeithasau Bach

Bydd y Cyngor yn mabwysiadu agwedd seiliedig ar risg at ei gyfrifoldebau gorfodi dros loteriau cymdeithasau bach. Mae'r Cyngor yn ystyried y gallai'r rhestr ganlynol, er nad yw'n cynnwys popeth, effeithio ar statws risg y gweithredwr:

- cyflwyno dychwelebau'n hwyr (rhaid cyflwyno dychwelebau cyn pen tri mis fan bellaf ar ôl dyddiad y loteri)
- cyflwyno dychwelebau anghyflawn neu anghywir
- torri'r terfynau ar gyfer loteriau cymdeithasau bach

Caiff gamblo anfasnachol ei ganiatáu os yw'n digwydd mewn achlysur anfasnachol, naill ai fel gweithgaredd atodol neu brif weithgaredd yn yr achlysur. Mae achlysuron yn anfasnachol os nad yw dim rhan o'r derbyniadau at elw preifat. Gall derbyniadau achlysuron o'r fath elwa un neu fwy o unigolion os caiff y gweithgaredd ei drefnu:

- gan, neu ar ran, elusen neu at ddibenion elusennol
- er mwyn galluogi cyfranogi mewn, neu ategu, gweithgareddau chwaraeon, athletau neu ddiwylliant.

Dylai elusennau a grwpiau cymunedol gysylltu â'r Cyngor trwy e-bost yn licensing@pembrokeshire.gov.uk neu drwy lythyr at y Tîm Trwyddedu, Isadran Diogelu'r Cyhoedd, Neuadd y Sir, Hwlfordd, Sir Benfro SA61 1TP.

5. Penderfynu

5.1 Gweinyddu, Arfer a Dirprwyo Swyddogaethau

Gall y Pwyllgor Trwyddedu, Is-bwyllgor neu un neu fwy o swyddogion yn gweithredu dan awdurdod dirprwyedig arfer pwerau a dyletswyddau'r Cyngor dan y Ddeddf.

Y farn yw y bydd llawer o'r swyddogaethau o natur weinyddol yn bennaf heb feysydd dadleuol i'w gweld. Er mwyn effeithlonrwydd ac effeithiolrwydd cost bydd y rhain, at ei gilydd, yn cael eu gwneud gan swyddogion.

Mae'r rhestr ganlynol yn cyflwyno'r dirprwyo swyddogaethau a phenderfyniadau sy'n cael eu cymeradwyo yn y canllawiau. Gall y Cyngor, serch hynny, gyfeirio unrhyw fater i'r Pwyllgor Trwyddedu neu Is-bwyllgor.

Mae'r rhestr ddirprwyo swyddogaethau trwyddedu yn Atodiad B.

5.2 Y Drefn Apelio

Mae hawliau apelio'r rhai a gafodd gam oherwydd penderfyniadau'r Cyngor yn cael eu cyflwyno yn Adrannau 206 i 209 o'r Ddeddf. Rhaid gwneud apeliadau i'r Llys Ynadon ar gyfer yr ardal lle mae'r awdurdod trwyddedu sydd wedi ystyried y cais.

Rhaid i'r apelydd cychwyn apêl trwy roi rhybudd o'r apêl i:

Clerc yr Ynadon
Llys Ynadon Hwlfordd
Hawthorn Rise
Hwlfordd
Sir Benfro
SA61 2AZ

o fewn cyfnod o 21 diwrnod, yn dechrau gyda'r diwrnod pan fydd yr apelydd yn derbyn rhybudd gan y Cyngor o'r penderfyniad y mae'r apêl yn ei erbyn.

Wrth benderfynu apêl, gall y Llys wneud y canlynol:

- Gwrthod yr apêl;
- Gwneud unrhyw benderfyniad arall y gallai'r awdurdod trwyddedu fod wedi'i wneud yn lle'r penderfyniad yr apeliwyd yn ei erbyn;
- Anfon yr achos yn ôl i'r awdurdod trwyddedu i ddelio â'r apêl yn unol â chyfarwyddyd y Llys;
- Gwneud gorchymyn ynghylch costau.

5.3 Rhoi Rhesymau dros Benderfyniadau

Gan ragweld apeliadau o'r fath, bydd y Cyngor yn rhoi rhesymau cynhwysfawr dros ei benderfyniadau. Bydd y Cyngor yn nodi i ba raddau y gwnaed penderfyniadau ar ôl ystyried unrhyw godau ymarfer a chanllawiau perthnasol a gyhoeddwyd gan y Comisiwn Gamblo, sy'n cyd-fynd o fewn rheswm â'r amcanion trwyddedu ac yn unol â'r Datganiad Polisi hwn.

5.4 Gweithredu Penderfyniad y Llys Ynadon

Cyn gynted ag yr hysbyswyd penderfyniad y Llys Ynadon i bawb, ni fydd y Cyngor yn oedi cyn ei weithredu a chaiff camau angenrheidiol eu cymryd ar unwaith oni bai y gorchmynnwyd gan lys uwch i ohirio camau o'r fath (er enghraifft, o ganlyniad i Adolygiad Barnwrol cyfredol). Nid yw'r Ddeddf yn darparu ar gyfer unrhyw apêl arall yn erbyn penderfyniad y Llys Ynadon.

5.5 Cwynion yn erbyn Eiddo Trwyddedig

Bydd y Cyngor yn ymchwilio i gwynion yn erbyn eiddo trwyddedig mewn cysylltiad â materion perthnasol i'r amcanion trwyddedu y mae'n gyfrifol amdanynt. Yn y lle cyntaf, caiff achwynwyr eu hannog i gwyno'n uniongyrchol wrth ddeiliad y drwydded neu'r busnes dan sylw i chwilio am benderfyniad lleol.

Pan fo rhywun â diddordeb wedi gwneud naill ai sylw dilys ynghylch eiddo trwyddedig neu gais dilys i adolygu trwydded, gall y Cyngor drefnu cyfarfod cymodi i ddechrau i eglurhau a rhoi sylw i'r materion sy'n peri pryder.

Ni fydd y broses hon yn gor-redeg hawl unrhyw un â diddordeb i ofyn bod yr Is-bwyllgor Trwyddedu'n ystyried dilysrwydd eu sylwadau neu i unrhyw ddeiliad trwydded wrthod cymryd rhan mewn cyfarfod cymodi.

Bydd holl sylwadau perthnasol yn cael eu hystyried yn briodol oni bai eu bod yn un o'r eithriadau yn Adran 5.6 isod.

5.6 Adolygiadau

Mae modd i awdurdodau cyfrifol neu rai â diddordeb wneud cais am adolygiad. Fodd bynnag, y Cyngor sydd i benderfynu a yw'r adolygiad i gael ei wneud ar sail unrhyw godau ymarfer a chanllawiau perthnasol a gyhoeddwyd gan y Comisiwn Gamblo, yn cyd-fynd o fewn rheswm â'r amcanion trwyddedu ac yn unol â'r Datganiad Polisi hwn.

Bydd y Cyngor hefyd yn ystyried a yw'r cais am yr adolygiad yn wamal, plagus, neu na fydd yn peri i'r Cyngor hwn newid / diddymu / atal y drwydded, neu a yw'n sylweddol yr un fath â sylwadau neu geisiadau blaenorol am adolygiad.

Gall y Cyngor hefyd ddechrau adolygiad o drwydded eiddo arbennig, neu ddosbarth arbennig o drwyddedau eiddo, am unrhyw reswm sy'n briodol yn ei farn.

Unwaith y bydd y Cyngor wedi derbyn cais dilys am adolygiad, fe all awdurdodau cyfrifol a rhai â diddordeb wneud sylwadau yn ystod cyfnod o 28 diwrnod. Mae'r cyfnod hwn yn dechrau 7 diwrnod ar ôl derbyn y cais gan y Cyngor, fydd yn cyhoeddi rhybudd o'r cais cyn pen 7 diwrnod ar ôl ei dderbyn.

Rhaid i'r Cyngor wneud yr adolygiad mor fuan ag y bo modd ar ôl i'r cyfnod o 28 diwrnod ar gyfer gwneud sylwadau fynd heibio.

Diben yr adolygiad fydd penderfynu a ddylai'r Cyngor gymryd unrhyw gamau mewn cysylltiad â'r drwydded. Os oes cyfiawnhad dros gymryd camau, y canlynol yw'r dewisiadau sydd ar gael i'r Cyngor:

- ychwanegu, dileu neu newid amod trwydded a bennwyd gan y Cyngor;
- eithrio amod diodyn a bennwyd gan yr Ysgrifennydd Gwladol (e.e. oriau agor) neu ddileu neu newid eithriad o'r fath;
- atal trwydded yr eiddo am gyfnod heb fod dros dri mis; a
- diddymu trwydded yr eiddo.

Wrth benderfynu pa gamau, os o gwbl, y dylid eu cymryd yn dilyn adolygiad, rhaid i'r Cyngor ystyried yr egwyddorion yn Adran 153 o'r Ddeddf, yn ogystal ag unrhyw sylwadau perthnasol.

Yn arbennig, gall y Cyngor hefyd lansio adolygiad o drwydded eiddo ar y sail nad yw deiliad trwydded eiddo wedi darparu cyfleusterau ar gyfer gamblo yn yr eiddo. Mae hyn er mwyn atal pobl rhag gwneud cais am drwyddedau mewn ffordd anturiol heb fwriadu eu defnyddio.

Unwaith y bydd yr adolygiad wedi'i orffen, rhaid i'r Cyngor, mor fuan ag y bo modd, hysbysu ei benderfyniad i'r canlynol:

- deiliad y drwydded;
- y ceisydd am adolygiad (os oes un);
- y Comisiwn;
- unrhyw un a wnaeth sylwadau;
- Prif Swyddog yr heddlu neu'r Prif Gwnstabl; a
- Comisiynwyr Ei Mawrhydi dros Gyllid a Thollau.

6. Amodau Trwyddedu a Chodau Ymarfer 2015 (LCCP)

Rhyddhaodd y Comisiwn Gamblo LCCP ym mis Chwefror 2015 i ddod i rym ym mis Mai 2015. Atgyfnerthodd y cod ofynion y cod cyfrifoldeb cymdeithasol (SR). Mae manylion y LCCP a'r cod SR i'w cael ar wefan y Comisiwn Gamblo www.gamblingcommission.gov.uk

Mae'r cod yn gofyn bod gweithredwyr yn gwneud y canlynol:

- Goruchwyllo cwsmeriaid yn effeithiol ar eiddo gamblo ac adnabod cwsmeriaid sydd mewn perygl o niwed cysylltiedig â gamblo
- O fis Ebrill 2016 ymlaen bod â chynlluniau sy'n caniatáu i gwsmeriaid wahardd eu hunain o holl weithredwyr tebyg yn y cylch lle maent yn byw ac yn gweithio

- Bod ag amrywiaeth o fesurau o ran marchnata i sicrhau cyfrifoldeb cymdeithasol sy'n agored a heb fod yn gamarweiniol
- O fis Ebrill 2016 ymlaen cynhyrchu asesiad risgiau ar eiddo unigol, a bod â pholisïau a threfnau a mesurau rheoli'n bodoli i liniaru risgiau lleol i'r amcanion trwyddedu.

Asesiadau Risg – Eiddo Betio

Mae gofyn asesiadau risgiau o'r fath gan geiswyr newydd, a thrwyddedeion eiddo presennol sy'n ceisio amrywio trwydded. Mae'r cod yn gofyn bod holl weithredwyr casinos, canolfannau gamblo oedolion, eiddo bingo, canolfannau adloniant i'r teulu, siopau betio a chanolwyr betio o bell yn asesu risgiau lleol i'r amcanion trwyddedu, a bod â pholisïau, trefnau a mesurau rheoli'n bodoli i liniaru'r risgiau hynny.

Mae'r cod SR yn gofyn bod gweithredwyr yn gweld bod yr asesiad risg ar gael i'r awdurdod trwyddedu wrth gyflwyno cais naill ai am drwydded eiddo newydd neu i amrywio trwydded eiddo, neu ar gais fel arall, a bydd hyn yn ffurfio rhan o gyfundrefn archwilio'r Cyngor ac fe all swyddogion ofyn amdanynt wrth ymchwilio i gwynion.

Mae'r cod yn gofyn bod y Cyngor yn datgan materion y bydd yn disgwyl i'r gweithredwr eu hystyried yn yr asesiad risg yn ei Ddatganiad o Bolisi ac mae'r Cyngor hwn yn disgwyl i weithredwyr ystyried y materion canlynol wrth wneud eu hasesiad risg:

- Gwybodaeth sy'n cael ei dal gan y trwyddedai ynghylch hunan-waharddiadau a mynychder gamblo dan oed;
- Tueddiadau gamblo all adlewyrchu taliadau budd-dal;
- Trefniant ar gyfer cyfnewid gwybodaeth yn lleol o ran hunan-waharddiadau a thueddiadau gamblo;
- Lleoliad trefol fel agosrwydd at ysgolion, amgylchedd masnachol, ffactorau'n effeithio ar nifer yr ymwelwyr;
- Amrywiaeth y cyfleusterau gerllaw'r eiddo trwyddedig fel mannau gamblo eraill, banciau, swyddfeydd post, lluniaeth a chyfleusterau adloniadol;
- Problemau hysbys yn y cylch fel problemau'n deillio o yfwyr ar y stryd, llanciau'n ymddwyn yn wrthgymdeithasol, gweithgareddau gwerthu cyffuriau, ac ati.

Mae'r Cyngor yn disgwyl i weithredwyr ystyried y materion canlynol wrth wneud eu hasesiadau risg:

Materion perthnasol i blant a phobl ifanc, gan gynnwys y canlynol:

- Sefydliadau, mannau neu ardaloedd lle dylid disgwyl presenoldeb plant a phobl ifanc fel ysgolion, clybiau ieuenctid, parciau, buarthau chwarae a mannau adloniant fel alïau bowlïo, sinemâu ac ati
- Unrhyw eiddo lle bydd plant yn casglu gan gynnwys safleoedd bysiau, caffis, siopau, ac unrhyw fan arall sy'n denu plant

- Ardaloedd sy'n dueddol o broblemau llanciau'n ymddwyn yn wrthgymdeithasol, gan gynnwys gweithgareddau fel graffiti / tagio, yfed dan oed, ac ati
- Digwyddiadau cofnodedig o geisio gamblo dan oed;

Materion perthnasol i oedolion diamddiffyn, gan gynnwys y canlynol:

- Gwybodaeth sy'n cael ei dal gan y trwyddedai o ran hunan-waharddiadau a mynychder gamblo dan oed
- Tueddiadau gamblo a allai adlewyrchu diwrnodau taliadau ariannol fel diwrnodau cyflog neu daliadau budd-dal
- Trefniadau ar gyfer cyfnewid gwybodaeth yn lleol o ran hunan-waharddiadau a thueddiadau gamblo
- Agosrwydd eiddo all gael ei fynychu gan bobl ddiamddiffyn fel ysbytai, cartrefi gofal preswyl, cyfleusterau meddygol, meddygfeydd, swyddfeydd tai'r Cyngor, clinigau dibyniaeth neu ganolfannau cymorth, mannau lle all pobl sy'n ddibynol ar alcohol neu gyffuriau gasglu, ac ati.

Ymhlith materion eraill i'w hystyried mae:

Materion ffydd, gan gynnwys holl enwadau crefyddol neu ffydd gan gynnwys agosrwydd at eglwysi, mosgau, temlau neu unrhyw addoldai eraill.

Nid yw'r rhestr hon yn cynnwys popeth a rhaid ystyried ffactorau eraill a nodwyd nad ydynt yn y rhestr hon.

7. Rhagor o Wybodaeth

Mae rhagor o wybodaeth am y Ddeddf, y Datganiad hwn o Bolisi Trwyddedu neu'r broses ymgeisio i'w chael oddi wrth:

Y Tîm Trwyddedu
Cyngor Sir Penfro
Neuadd y Sir
Hwlfordd
Sir Benfro
SA61 1TP

Ffôn: 01437 764551

Ffacs: 01437 775260

E-bost: licensing@pembrokeshire.gov.uk

Gwefan: www.pembrokeshire.gov.uk

Mae gwybodaeth i'w chael hefyd oddi wrth:

Y Comisiwn Gamblo
Victoria Square House
Birmingham

B2 4BP
Ffôn: 0121 230 6666
Ffacs: 0121 230 6720
E-bost: info@gamblingcommission.gov.uk
Gwefan: www.gamblingcommission.gov.uk

Yr Adran dros Ddiwylliant, y Cyfryngau a Chwaraeon
2– 4 Cockspur Street
Llundain
SW1Y 5DH
Ffôn: 020 7211 6200
Gwefan: www.culture.gov.uk

Atodiad A Mynediad at Eiddo

Casinos

- Rhaid i'r brif fynedfa i'r eiddo fod o stryd;
- Ni chaiff unrhyw fynedfa i gasino fod o eiddo sy'n cael ei ddefnyddio'n gyfan gwbl neu'n bennaf gan blant a/neu bobl ifanc;
- Ni chaiff unrhyw gwsmer fynd i mewn i gasino'n uniongyrchol o unrhyw eiddo arall sy'n dal trwydded eiddo gamblo.

Canolfan Gamblo Oedolion

- Ni chaiff unrhyw gwsmer fynd i'r eiddo'n uniongyrchol o unrhyw eiddo gamblo trwyddedig arall.

Siopau Betio

- Rhaid i fynediad fod o stryd neu o eiddo arall gyda thrwydded eiddo betio;
- Dim mynediad uniongyrchol o siop fetio i eiddo arall sy'n cael ei ddefnyddio ar gyfer manwerthu nwyddau neu wasanaethau. I bob diben ni all fod mynedfa i siop fetio o unrhyw fath o siop ac ni fyddai modd cael siop fetio yng nghefn caffi – byddai'r ardal gyfan yn gorfod cael ei thrwyddedu.

Traciau

Ni ddylai unrhyw gwsmer allu cyrraedd yr eiddo'n uniongyrchol:

- o gasino;
- o ganolfan gamblo oedolion.

Eiddo Bingo

Ni chaiff unrhyw gwsmer gyrraedd yr eiddo'n uniongyrchol:

- o gasino;
- o ganolfan gamblo oedolion;
- o eiddo betio, heblaw trac.

Canolfan Adloniant i'r Teulu

Ni chaiff unrhyw gwsmer gyrraedd yr eiddo'n uniongyrchol:

- o gasino;
- o ganolfan gamblo oedolion;
- o eiddo betio, heblaw trac.

Mae Rhan 7 o Ganllawiau'r Comisiwn Gamblo i awdurdodau trwyddedu yn cynnwys rhagor o gyfarwyddyd ar y mater hwn, y bydd yr Awdurdod hwn hefyd yn ei ystyried wrth benderfynu.

Atodiad B Rhestr Ddirprwy Swyddogaethau a Phenderfyniadau Trwyddedu

Materion i'w trin	Cabinet	Is-bwyllgor	Swyddogion
Polisi Gamblo tair blynedd	x		
Polisi i beidio â chaniatáu casinos		x	
Pennu ffioedd – pan fo hynny'n briodol	x		
Cais am drwydded eiddo		Lle derbyniwyd sylwadau heb eu tynnu'n ôl	Lle na dderbyniwyd sylwadau / tynnwyd sylwadau'n ôl / awdurdod i hepgor gwrandawriad os yw pawb yn gytûn / awdurdod i asesu os yw sylw'n ddilys.
Cais am amrywio trwydded		Lle derbyniwyd sylwadau heb eu tynnu'n ôl	Lle na dderbyniwyd sylwadau / tynnwyd sylwadau'n ôl / awdurdod i hepgor gwrandawriad os yw pawb yn gytûn / awdurdod i asesu os yw sylw'n ddilys.
Cais i drosglwyddo trwydded		Lle derbyniwyd sylwadau'r Comisiwn	Lle na dderbyniwyd sylwadau'r Comisiwn
Cais am ddatganiad darpariaethol		Lle derbyniwyd sylwadau heb eu tynnu'n ôl	Lle na dderbyniwyd sylwadau / tynnwyd sylwadau'n ôl / awdurdod i hepgor gwrandawriad os yw pawb yn gytûn / awdurdod i asesu os yw sylw'n ddilys.
Adolygu trwydded eiddo		x	
Diddymu trwydded eiddo am beidio â thalu tâl trwydded flynyddol			x
Cais am hawlenni gamblo clwb / peiriannau clwb		Lle gwnaed gwrthwynebiadau (a heb eu tynnu'n ôl)	Lle na dderbyniwyd sylwadau / tynnwyd sylwadau'n ôl / awdurdod i hepgor

Materion i'w trin	Cabinet	Is-bwyllgor	Swyddogion
			gwrandawriad os yw pawb yn gytûn / awdurdod i asesu os yw sylw'n ddilys.
Diddymu hawlenni gamblo clwb / peiriannau clwb			x
Ceisiadau am hawlenni eraill			x
Diddymu hawlenni peiriannau gamblo eiddo trwyddedig			x
Ystyried rhybudd defnydd dros dro			x
Penderfyniad i roi gwrthrybudd i rybudd defnydd dros dro		x	

Atodiad C Diffiniadau

SYLWCH: Yn y polisi hwn, caiff y diffiniadau canlynol eu cynnwys i roi esboniad o dermau arbennig sydd yn y Ddeddf ac, felly, yn y Datganiad o Bolisi Trwyddedu. Mewn rhai achosion maent yn fyrfodd o'r hyn sydd yn y Ddeddf neu'n ddehongliad o'r termau hynny. I gael diffiniad llawn o'r termau a ddefnyddir, rhaid cyfeirio at y Ddeddf.

Ystyr 'y Cyngor' yw Cyngor Sir Penfro, yn gweithredu fel yr Awdurdod Trwyddedu yn ôl diffiniad Deddf Gamblo 2005.

Ystyr 'y Ddeddf' yw Deddf Gamblo 2005.

Ystyr 'y Sir' yw Sir Benfro.

Ystyr 'y Canllawiau' yw Canllawiau'r Comisiwn Gamblo i awdurdodau lleol.

'Yr Awdurdod Trwyddedu' yw'r awdurdod lle mae'r eiddo'n sefyll yn gyfan gwbl / yn rhannol. Mae'r awdurdod trwyddedu (fel yn yr awdurdod dyroddi) hefyd yn awdurdod cyfrifol.

'Y Comisiwn Gamblo' yw corff a sefydlwyd gan y Llywodraeth fel y rheolydd unedig ar gyfer gamblo, yn disodli'r Bwrdd Gamblo.

Ystyr 'awdurdod cyfrifol' yw corff cyhoeddus sy'n rhaid ei hysbysu o geisiadau arbennig am drwyddedau eiddo a hawlenni, ac sydd â hawl i wneud sylwadau ar unrhyw un o'r amcanion trwyddedu.

Ystyr 'plant' yw unigolion sydd dan 16 oed.

Ystyr 'pobl ifanc' yw unigolion sy'n 16 oed a than 18 oed.

Ystyr 'Amodau Gorfodol' yw amodau penodol sy'n cael eu darparu gan Reoliadau i'w hatodi at drwyddedau eiddo.

Ystyr 'Amodau Diofyn' yw amodau penodol a ddarparwyd ar eu cyfer drwy Reoliadau i'w hatodi at drwydded oni bai fod y Cyngor yn eu heithrio.

Ystyr 'Eiddo' yw unrhyw fan, gan gynnwys cwch neu adeiledd symudol.

Atodiad D Crynodeb o Ddarpariaeth Peiriannau yn ôl Eiddo

Categori Peiriannau							
Math o eiddo	A	B1	B2	B3	B4	C	D
Casino mawr (cymhareb peiriannau / byrddau o 5-1 hyd at yr uchafswm)				Uchafswm o 150 peiriant Unrhyw gyfuniad o beiriannau categorïau B i D (heblaw peiriannau B3A), o fewn yr uchafswm o 150 (yn amodol ar gymhareb peiriannau / byrddau)			
Casino bach (cymhareb peiriannau / byrddau o 2-1 hyd at yr uchafswm)				Uchafswm o 80 peiriant Unrhyw gyfuniad o beiriannau categorïau B i D (heblaw peiriannau B3A), o fewn yr uchafswm o 80 (yn amodol ar gymhareb peiriannau / byrddau)			
Casino cyn Deddf 2005 (dim cymhareb peiriannau / byrddau)				Uchafswm o 20 peiriant categorïau B i D (heblaw peiriannau B3A), neu unrhyw nifer o beiriannau C neu D yn hytrach			
Eiddo betio a thraciau lle mae betio cronfa				Uchafswm o 4 peiriant categorïau B2 i D (heblaw peiriannau B3A)			
Eiddo bingo 1		Uchafswm o 20% o gyfanswm y peiriannau gamblo sydd ar gael i'w defnyddio yn yr eiddo categorïau B3 neu B4			Dim cyfyngiad ar beiriannau categori C neu D		
Canolfan gamblo oedolion 2		Uchafswm o 20% o gyfanswm y peiriannau gamblo sydd ar gael i'w defnyddio yn yr eiddo categorïau B3 neu B4			Dim cyfyngiad ar beiriannau categori C neu D		
Canolfan drwyddedig adloniant i'r teulu 3				Dim cyfyngiad ar beiriannau categori C neu D			
Canolfan adloniant i'r teulu (gyda hawlen) 3				Dim cyfyngiad ar beiriannau categori D			
Clybiau neu Sefydliad Lles Glowyr (gyda hawlen) 4				Uchafswm o 3 pheiriant yng nghategoriâu B3A neu B4 i D			
Eiddo cymhwysol trwyddedig ar gyfer alcohol				1 neu 2 o beiriannau yng nghategori C neu D yn ddiofyn ar hysbysiad			
Eiddo cymhwysol trwyddedig ar gyfer alcohol (gyda hawlen peiriannau gamblo eiddo trwyddedig)				Nifer y peiriannau categori C-D fel y pennwyd ar yr hawlen			
Ffair deithiol		Dim cyfyngiad ar beiriannau categori D					